

萬有文庫

第一集一千種


王雲五主編


王臨川集

(三)

王安石著

商務印書館發行





臨川先生文集

(三)

王安石著

國學基本叢書

# 臨川先生文集

## 卷十五

### 律詩

#### 次韻唐公三首

##### 東陽道中

山蔽吳天密。江蟠楚地深。浮雲堆白玉。落日寫黃金。渺渺隨行旅。紛紛換歲陰。強將詩詠物。收拾濟時心。

##### 江行

材非常世用。轂有故人推。使節春冬換。征帆日夜開。南遊取于越。東望得州來。試盡風波惡。生涯亦可哀。

##### 旅思

此身南北老。愁見問征途。地大蟠三楚。天低入五湖。看雲心共遠。步月影同孤。慷慨秋風起。悲歌不爲鱸。

##### 烏塘

地僻居人少。山稠伏獸多。怒狸朝搏鴈。嚙虎夜窺騾。籬落生孫竹。門庭上女蘿。未應悲寂寞。六載一經過。

##### 欲歸

水漾青天暖。沙吹白日陰。塞垣春錯莫。行路老侵尋。綠稍還幽草。紅應動故林。留連一盃酒。滿眼欲歸心。

##### 發館陶

促轡數殘更，似聞雞一鳴。春風馬上夢，沙路月中行。笳鼓遠多思，衣裘寒始輕。稍知田父穩，燈火閉柴荆。

王村

曉靄王村路，春風北使旗。塵催輕騎走，寒咽短簫吹。攬轡聯貂帽，投鞭各酒卮。紛紛小兒女，何事倚牆窺。

長垣北

攬轡長垣北，貂寒不自持。霜風急鼓吹，煙月暗旌旗。騎火流星點，牆桑亞戟枝。柴荆掩春夢，誰見我行時。

冬日

擾擾今非昔，漫漫夜復晨。風沙不貸客，雲日欲迷人。散髮愁邊老，開顏醉後春。轉思江海上，一洗白綸巾。

壬辰寒食

客思似楊柳，春風千萬條。更傾寒食淚，欲漲冶城潮。巾髮雪爭出，鏡顏朱早凋。未知軒冕樂，但欲老漁樵。

雨中

尚疑櫻欲吐，已恠菊成漂。紫萸凌風怯，青苔挾雨驕。長閑故有味，多難自無聊。牢落柴荆晚，生涯付一瓢。

宿雨

綠攪寒蕪出，紅爭暖樹歸。魚吹塘水動，鴈拂塞垣飛。宿雨驚沙盡，晴雲晝漏稀。却愁春夢短，燈火著征衣。

乘日

乘日塞垣入，御風塘路歸。胡皆躍馬去，鴈卻背人飛。煙水吾鄉似，家書驛使稀。忽忽照顏色，恨不洗征衣。

秋露

日月凋何急。荒庭露送秋。初疑宿雨滋。稍怪曉霜稠。曠野將馳獵。華堂已御裘。空令半夜鶴。抱此一端愁。

還自河北應客

魏客問謠俗。舊傳今自如。材難知驥馬。味美賽河魚。塞水移民久。川防動衆初。北人雖異論。時議或非踈。

將次洛州憩漳上

漠漠春風裏。茸茸綠未齊。平田鷓散啄。深樹馬迎嘶。地入河流曲。天隨日去低。高城已在眼。聊復解輕齋。

和仲庶夜過新開湖憶冲之仲涂共泛

水遠浮秋色。河空洗夜氛。行隨一明月。坐失兩孤雲。露髮此時溼。風顏何處醺。淹留各有趣。不比漢三君。

白樂天有二處成孤雲之句。

送契丹使還次韻答淨因老

老欲求吾志。時方撫我華。強將愁出塞。空得病還家。日轉山河暖。風含草木葩。勝遊思一往。不敢問三車。

送吳叔開南征

摻袂不勝情。犀舟擊汰行。倦遊無萬里。惜別有千名。春草淒淒綠。江楓湛湛清。金陵多麗景。此去屬蘭成。

遊棲霞菴約平甫至因寄

渺渺林間路。蕭蕭物外僧。高陰涼易入。閑貌老難增。官事真傷錦。君恩更飲冰。求田此山下。終欲忤陳登。

和棲霞寂照菴僧雲渺平甫

蕭然一世外。所樂有誰同。宴坐能忘老。齋蔬不過中。無心爲佛事。有客問家風。笑謂西來意。雖空亦不空。

宜春苑

宜春舊臺沼。日暮一登臨。解帶行蒼蘚。移鞍一作鞍坐綠陰。樹疎啼鳥遠。水靜落花深。無復增修事。君王惜費金。

春日

冉冉春行暮。非非物競華。鶯猶求舊友。鷺不背貧家。室有賢人酒。門無長者車。醉眠聊自適。歸夢到天涯。

癸卯追感正月十五事

正月端門夜。金輿繚繚中。傳觴三鼓罷。縱觀萬人同。警蹕聲如在。嬉遊事已空。但令千載後。追詠太平功。

晚興和沖卿學士

剡剡風生晚。娟娟月上初。白沙眠綠驥。清浪浴鱣魚。竟欲從君飲。猶便讀我書。斜陽不到處。牆角樹扶疎。

秋興和沖卿

雲浮朝慘淡。風起夜颼颼。欲作冰霜地。先迴草樹秋。征人倚笛怨。思婦向砧愁。爲問隨陽鴈。哀鳴豈有求。

次韻沖卿除日立春

猶殘一日臘。併見兩年春。物以終爲始。人從故得新。迎陽朝翦綵。守歲夜傾銀。恩賜隨嘉節。無功祗自塵。

題友人郊居水軒

田中三畝宅。水上一軒開。爲有漁樵樂。非無仕進媒。槎頭收晚釣。荷葉卷新醅。坐說魚腴美。功名挽不來。

遊賞心亭寄虔州女弟

秀發千峰霽。清涵萬里秋。滄江天上落。明月鏡中流。眼與魂俱斷。身依影獨留。爲憐幽興極。不見爾來遊。

江亭晚眺

日下崦嵫外。秋生沆碭間。清江無限好。白鳥不勝閑。雨過雲收嶺。天空月上灣。歸鞍侵調角。回首六朝山。

金山寺

重經高處寺。一與白雲親。樹木有春意。江山如故人。幽軒含氣象。偏影落風塵。日暮臨歸去。徘徊欲損神。

揖仙閣

結閣揖仙子。疏塘臨隱扉。水花紅四出。山竹翠相圍。雲度疑駟下。鳧驚恐鳥飛。蜀韁寧可恃。投釣此忘歸。

舟夜卽事

火炬臨遙岸。餘光照客船。水明魚中餌。沙暖鷺忘眠。感慨無窮事。遲回欲曉天。山泉如有意。枕上送潺湲。

何處難忘酒二首擬白樂天作

何處難忘酒。英雄失志秋。廟堂生莽卓。巖谷死伊周。賦斂中原因。干戈四海愁。此時無一盞。難遣壯圖休。

二

何處難忘酒。君臣會合時。深堂拱堯舜。密席坐臯夔。和氣襲萬物。歡聲連四夷。此時無一盞。眞負鹿鳴詩。

送孫子高

蕩漾江南客。融怡席上珍。一罇相別酒。千里獨歸人。客路貧堪病。交情遠更親。自慙兒女意。失淚滴衣巾。

送董傳

悠悠隴頭水，日夜向西流。行路未云已，歸人空復愁。文章合用世，顏髮未驚秋。一聽秦聲罷，還來上國遊。

寄深州晁同年

秀色歸荒隴，新聲換鬢毛。日催花葉急，雲避鴈行高。駐馬旌旗暖，傳觴鼓吹豪。班春不知負，短髮爲君搔。

白雲然師

白首一山中，形骸槁木同。苔爭庵徑路，雲補衲穿空。塵土隨車轍，波濤信柂工。昏昏老南北，應謝此高風。

自白土村入北寺二首

木杪田家出，城陰野逕分。溜渠行碧玉，畦稼臥黃雲。薄槿胭脂染，深荷水麝焚。夕陽人不見，雞鶩自成羣。

二

雨過百泉出，秋聲連衆山。獨尋飛鳥外，時渡亂流間。坐石偶成歇，看雲相與還。會須營一畝，長此聽潺湲。

題朱郎中白都莊

蕭灑桐廬守，滄洲寄一廛。山光隔釣岸，江氣雜炊煙。藜杖聽鳴鷺，籃輿看種田。明時須共理，此興在他年。

史教授獨善堂

湖海十年舊，林塘三畝餘。靜非談者隱，貧勝富人居。列鼎亦何有，幅巾聊自如。猶應不獨善，學子滿階除。

寄福公道人

帝力護禪林，滄洲側布金。樓依水月觀，門接海潮音。開士但軟語，遊人多苦吟。曾同方丈宿，燈火夜沉沉。

身閑



身閑宜晚食。歲晏忌晨興。人自嘲便腹。吾方樂曲肱。睡蛇雖不去。夢虺已無憑。寄語中林客。思禪病未能還家。

還家豈不樂。生事未應閑。朝日已復出。征鞍方更攀。傷心百道水。闔目萬重山。何以忘羈旅。翛然醉夢間。題湯泉壁示諸子有欲閑之意。

吟哦一水上。披寫衆峯間。偶運非彭澤。留名比峴山。君才今禹稷。家行古原顏。平世雖多士。安能易地閑。和唐公舍人訪淨因。

西城方外士。傳法自南華。高蹈玩一世。旁通兼數家。來遊仁者淨。傳詠正而葩。乘興何時載。還能託後車。沂溪懷正之。

故人何處所。天角浪漫漫。寂寞斷音驛。徘徊愁肺肝。世情紛可怪。旅況浩難安。願化東南鶴。高飛託羽翰。答許秀才。

高陽有才子。負笈求晨飧。所趣少知者。其辭多慨然。樵妻竟謝絕。漂母嘗哀憐。尙友古之人。于今猶壯年。

### 卷十六

#### 律詩

##### 次韻景仁雪霽

新聲生屋霑。殘點着垣衣。委翳無多在。飄零不更飛。坳中餘宿潤。暖處自朝暉。稍見青青色。還從柳上歸。

次韻范景仁二月五日夜風雪

何知此邂逅。談笑接清揚。對雪知春淺。回燈惜夜長。密雲通炫晃。殘月墮冥茫。故有臨邛客。抽毫興未忘。

次韻沖卿過睢陽

宮廟此神鄉。留親泊楚煌。天開今壯麗。地積古悲涼。不改山河舊。猶餘草木荒。還聞足賓客。誰是漢鄒陽。

答沖卿

風作九衢黃。南窗坐正涼。破瓜青玉美。浮菴白雲香。詩懶猶能強。官閑肯便忘。賢愚各有用。尺寸果誰長。

得書知二弟附陳師道舟上汴

兒童聞太丘。邂逅兩心投。與汝今爲伴。知吾不復憂。園桃已解萼。沙水欲驚舟。一見南飛鴈。江邊肯更留。

初憩和州

衣足一囊弊。粟餘三釜陳。猶依食貧地。已媿省煩人。塵土病催老。風波愁過春。詩書今在眼。還欲討經綸。  
瘡起舍弟尙未已。示道原

送杜十八之廣南

側足呻吟地。連臺瘴瘴秋。窮鄉鑿自紉。小市藥難求。肝膽疑俱破。筋骸漫獨瘳。慚君遠從我。契闊每同憂。

崑山慧聚寺張祐韻

東南炎海外。尋訪又輸君。過嶺猿啼暖。貪程馬送曛。清談消瘴癘。秀句起煙雲。及早來鄉薦。朝廷尙右文。  
峯嶺互出沒。江湖相吐吞。園林浮海角。臺殿擁山根。百里見漁艇。萬家藏水村。地偏來客少。幽興祗桑門。

吳江

莽莽昔登臨。秋風一散襟。地留孤嶼小。天入五湖深。柑橘無千里。魚蝦有萬金。吾雖輕范蠡。終欲此幽尋。

江

靈源開闢有。羸縮但相隨。逆折山能礙。奔流海與期。泥沙拆蚌蛤。雲雨暗蛟螭。欲問深何許。馮夷祇自知。

江南

江南春起柁。秋至尙波濤。問舍才能定。呼舟已復操。行歌付浩蕩。歸夢得蕭騷。冉冉欲何補。紛紛爲此勞。

賈生

漢有洛陽子。少年明是非。所論多感槩。自信肯依違。死者若可作。今人誰與歸。應須蹈東海。不但涕沾衣。

還自舅家書所感

行行過舅居。歸路指親廬。日苦樹無賴。天空雲自如。黃焦下澤稻。綠碎短樊蔬。沮溺非吾意。憫嗟聊駐車。

世事

世事一何稠。論心日已偷。尙蒙今士笑。宜見古人羞。老圃聊須問。良田亦欲求。非關畏黻冕。無責易身修。

寄純甫

塞上無花草。飄風急我歸。梢林聽澗落。卷土看雲飛。想子當紅藥。思家上翠微。江寒亦未已。好好著春衣。

招丁元珍

默默不自得。紛紛何所爲。晝漫聊取食。獵較且隨時。秋入江湖暗。風生草樹悲。黃花一杯酒。思與故人持。

遊杭州聖果寺

登高見山水，身在水中中央。下視樓臺處，空多樹木蒼。浮雲連海氣，落日動湖光。偶坐吹橫笛，殘聲入富陽。京兆杜嬰大醇能讀書，其言近莊，其爲人曠達而廉清，自託於醫，無貴賤請之輒往，卒也以詩二首傷之。

蕭瑟野衣巾，能忘至老貧。避囂依市井，蒙垢出埃塵。接物工齊物，勞身恥爲身。傷心宿昔地，不復見斯人。

叔度醫家子，君平卜肆翁。蕭條昨日事，髣髴古人風。舊宅雨生菌，新阡寒轉蓬。存亡誰一問，嗟我亦窮空。

江上

潮連風浩蕩，沙引客淹留。落日更清坐，空江無近舟。共看蒹葦宅，聊卽稻粱謀。未敢嗟艱食，凶年半九州。

二

書自江邊使，鄉鄰病餓稠。何言萬里客，更作百身憂。補敗今誰卹，趨生我自羞。西南雙病眼，落日倚扁舟。

夏夜舟中頗涼因有所感

扁舟畏朝熱，望夜倚桅檣。日共火雲退，風兼水氣涼。未秋輕病骨，微曙浣愁腸。望我江湖意，滔滔興不忘。

孤桐

天質自森森，孤高幾百尋。凌霄不屈己，得地本虛心。歲老根彌壯，陽驕葉更陰。明時思解慍，願斲五絃琴。

遲明

欹枕浩無情。蘧蘧獨遲明。霜繁紅樹老。雲淨素蟾清。倦鵲猶三市。寒雞未一鳴。故山何處所。應有曉猿驚。

陪友人中秋夕賞月

海霧看如洗。秋陽望却昏。光明疑不夜。清瑩欲無坤。掃掠風前坐。留連露下蹲。苦吟應到曉。況有我思存。

慎縣修路者

畚築今三歲。康莊始一修。何言野人意。能助令君憂。勦力非無補。論心豈有求。十年空志食。因汝起予羞。

河勢

河勢浩難測。禹功傳所聞。今觀一川破。復以二渠分。國論終將塞。民嗟亦已勤。無災等難必。從衆在吾君。

送河間晁寺丞

公孫富文墨。名字世多知。談笑取高第。弦歌當此時。臨河薪石費。近塞繭絲移。緩急常愁此。看君有所爲。

暮春

春期行晼晚。春意賸芳菲。曲水應修禊。披香未試衣。雨花紅半墮。煙樹碧相依。悵望夢中地。王孫底不歸。

遊北山

攬轡出東城。登臨目暫明。煙雲藏古意。猿鶴弄秋聲。客坐苔紋滑。僧眠樾蔭清。賞心殊未已。山下日西榮。

吳正仲謫官得故人寄蟹以詩謝之余次其韻

越客上荆舫。秋風憶把螯。故煩分巨跪。持用佐清糟。飲量寬滄海。詩鋒捷孟勞。甘餐飽觴詠。餘事付鈞陶。

陳師道宰烏程縣

嘗聞太丘長。德不負公卿。墟墓今千載。昆雲亦一城。本懷深閉蓄。餘論略施行。故自有仁政。能傳家世聲。

冬至

都城開博路。佳節一陽生。喜見兒童色。歡傳市井聲。幽閑亦聚集。珍麗各攜擎。却憶他年事。關商閉不行。

湯泉

寒泉詩所詠。獨此沸如烝。一氣無冬夏。諸陽自廢興。人游不附火。蟲出亦疑冰。更憶驪山下。歎然雪滿塍。

讀鎮南邸報癸未四月作

賜詔寬言路。登賢壯陛廉。相期正在治。素定不煩占。衆喜夔龍盛。予虞絳灌愆。太平詎可致。天意慎猜嫌。

擬和御製賞花釣魚

雲暖篷萊日。風酣太液春。水光承步輦。花氣入鈎陳。伏檻留清蹕。傳觴屬從臣。霏香連釣餌。落葉亂游鱗。

鎬飲恩知厚。衢樽賜願均。更看追夏諺。先此詠逢辰。

和吳沖卿雪霽紫宸朝

虎士開闔闔。雞人唱九霄。雲移銀闕角。日轉玉廊腰。箠動川收潦。靴鳴海上潮。舞袍沾宿潤。拜笏擁殘飄。

賜飲人何樂。歸嘶馬亦驕。低徊但忘食。吟詠得逍遙。

和吳沖卿集禱齋祠

緘封祝辭密。占寫御名真。帝坐遙臨物。星圖俯映人。風含煙外節。月點霧中茵。沈藿升煙遠。槐檀取燎新。

羽衣歸寂寞。金鏡立逡巡。卻想來時路。還疑隔一塵。

送周都官通判湖州

淥水烏程地。青山顧渚濱。酒醪猶美好。茶薺正芳新。聚泛樽前月。分班焙上春。仁風已入俗。樂事始關身。橘柚供南貢。楓槐望北宸。知君白羽扇。歸日未生塵。

雙廟張巡許遠

兩公天下駿。無地與騰驤。就死得處所。至今猶耿光。中原擅兵革。昔日幾侯王。此獨身如在。誰令國不亡。北風吹樹急。西日照窗涼。志士千年淚。冷然落奠觴。

和子瞻同王勝之游蔣山井序

子瞻同王勝之游蔣山有詩。余愛其峯多巧障日。江遠欲浮天之句。因次其韻。金陵限南北。形勢豈其然。楚役六千里。陳亡三百年。江山空幕府。風月自舳船。主送悲涼岸。妃埋想故蓮。臺傾鳳久去。城踞虎爭偏。司馬墻廟域。獨龍層塔顛。森疎五願木。蹇淺一人泉。柷杖窮諸嶺。藍輿罷半天。朱門園淥水。碧瓦第青煙。墨客真能賦。留詩野竹娟。

送鄆州知府宋諫議

盛世千齡合。宗工四海瞻。天心初顛俊。雲翼首離潛。德望完圭角。儀形壯陸廉。徐鳴蒼玉佩。盡校碧牙籤。綸掖清光注。鑾坡茂渥霑。文明誠得主。政瘼尙煩砭。右府參機務。東塗贊景炎。廟談資石畫。兵略倚珠鈴。坐鎮均勞逸。齋居養智恬。謳謠喧井邑。惠化穆蒼黔。進律朝章舊。疏恩物議僉。通班三殿邃。徙部十城兼。

申甫周之翰。龜蒙魯所詹。地靈奎宿照。野沃汶河漸。首路龍旗盛。提封虎節嚴。賜衣纏紫艾。衛甲綴朱綬。海谷移文省。谿堂燕豆添。班春回紺纜。問俗卷彤襜。舟楫商巖命。熊羆渭水占。治裝行入覲。金鼎重調鹽。見遠亭上王郎中

高亭豁可望。朝暮對谿山。野色軒楹外。霞光几席間。樹侵蒼靄沒。鳥背夕陽還。草帶平沙闊。烟籠別戍閑。圃畦荷氣合。田徑燒痕斑。樵笛吟晴塢。漁帆出暝灣。登臨及芳節。宴喜發朱顏。夾砌陳旌旆。褰簾進佩環。觀風南國最。應宿紫宸班。康樂詩名舊。蕪音詎可攀。

卷十七

律詩 七言八句

歲晚懷古

先生歲晚事田園。魯叟遺書廢討論。問訊桑麻憐已長。按行松菊喜猶存。農人調笑追尋壑。稚子歡呼出候門。遙謝載醪祛惑者。吾今欲辯已忘言。

段約之園亭

愛公池館得忘機。初日留連至落暉。菱暖紫鱗跳復沒。柳陰黃鳥嘯還飛。徑無凡草唯生竹。盤有嘉蔬不采薇。勝事闔州雖或有。終非吾土豈如歸。

又段氏園亭



歇眠隨水轉東垣。一點炊煙映水昏。漫漫芙渠難覓路。翛翛楊柳獨知門。青山呈露新如染。白鳥嬉游靜不煩。朱雀航邊今有此。可能搖蕩武陵源。

回撓

柴荆散策靜涼颺。隱几扁舟白下潮。紫磨月輪升靄靄。帝青雲幕卷寥寥。數家鷄犬如相識。一塢山林特見招。尙憶木瓜園最好。興殘中路且回撓。

醪釀金沙二花合發

相扶照水弄春柔。發似矜夸斂似羞。碧合晚雲霞上起。紅爭朝日雪邊流。我無丹白知如夢。人有朱鉛見卽愁。疑此冶容詩所忌。故將樛木比綢繆。

次韻公關正議書公戲語中之以祝助發一笑

故人辭祿未忘情。語我猶能作扞城。身不自遭如貢薛。兒應堪教比韋平。老鵝豈得長高臥。雛鳳仍聞已間生。把盞祝公公莫拒。緇衣心爲好賢傾。

次韻致遠木人洲二首

迷子山前漲一洲。木人圖志失編收。年多但有柳生肘。地僻獨無茅蓋頭。河側鮑生乾尙立。江邊屈子槁將投。未妨他日稱居士。能使君疑福可求。

二

杙爾何年客此洲。飄流誰棄止誰收。無心使口肝使目。有幹作身根作頭。暴露神靈難寄託。禱祠村落幾

依投紛紛翦紙真虛負。立稿安知富可求。

次韻酬龔深甫二首

恩容楚老護松楸。復得一龔從我遊。講肄劇談兼祖謝。舞雩高蹈異求由。北尋五柞故未慙。東挽三楊仍有樛。陟巘降原從此始。但無瑤玉與君舟。

二

握手東岡雪滿簪。後期惆悵老吳蠶。芳辰一笑真難值。暮齒相思豈久堪。他日杜詩傳渭北。幾時周宅對漳南。百年邂逅能多少。且可勤來共草菴。

次葉致遠韻

生涯聊占水中洲。豈卽乘桴逐聖丘。身與鳧飛仍鴈集。心能茅靡亦波流。由來杞梓常先伐。誰謂菰蒲可久留。乘興吾廬知未厭。故移脩竹擬延騶。一作知君聊占水中洲。去即東浮逐聖丘。憂國無時須問舍。得坻有興即乘流。由來要路當先據。誰謂窮鄉可久留。他日五湖尋范蠡。想能重此駐前騶。

次韻酬朱昌叔五首

點也自殊由與求。旣成春服更何憂。拙於人合且天合。靜與道謀非食謀。未愛京師傳谷口。但知鄉里勝壺頭。嗟予老矣無一事。復得此君相與遊。

二

去年音問隔淮州。百謫難知亦我憂。前日杯盤共江渚。一歡相屬豈人謀。山蟠直瀆輸淮口。水抱長干轉

石頭乘興舟與無不可。春風從此與公遊。

三

烏榜登臨興未休。共言何許更消憂。聯裾蕭寺尋真覺。方駕孫陵弔仲謀。語罷每開歡笑口。詩來仍掉苦吟頭。已知軒冕真吾累。且可追隨馬少游。

四

白下門東春水流。相看一噓散千憂。穿梅入柳曾莫逆。度壑緣岡初不謀。世事但如吹劍首。官身難卽問刀頭。長臨鍛竈真自苦。有興復來從我遊。

五

樂世閑身豈易求。巖居川觀更何憂。放懷自事如初服。買宅相招亦本謀。名譽子真於谷口。事功新息困壺頭。知君於此皆無累。長得追隨壙垆遊。

次韻送程給事知越州

千騎東方占上頭。如何誤到北山遊。清明若覩蘭亭月。暖熱因忘蕙帳秋。投老始知歡可惜。通宵豫以別爲憂。西歸定有詩千首。想肯重來賁一丘。

次韻酬徐仲元

投老逍遙配與堂。天刑真已脫桁楊。緣源靜翳無魚淥。度谷深追有鳥顏。每苦交游尋五柳。最嫌尸祝擾庚桑。相看不厭唯夫子。風味真如顧建康。

詩奉送覺之奉使東川

三秋不見每惓惓，握手山林復悵然。後會敢期黃耆日，相看且度白鷄年。畏途石棧王尊馭，榮路金門祖  
逖鞭。一代官儀新藻拂，得瞻宸宇想留連。

次韻奉酬覺之

久知乘傳入西州，雞黍從容本不謀。戶外驚塵尺書至，眼中飛浪片帆收。山林病骨煩三顧，湖海離腸欲  
萬周。尚有光華賁岑寂，篋中佳句得長留。

送程公關得謝歸姑蘇

東歸行路嘆賢哉，碧落新除寵上才。白傅林塘傳畫去，吳王花鳥入詩來。唱酬自有微之在，談笑應容逸  
少陪。少保元絳謝事居姑蘇。又王中甫善歌詞，與相唱酬燕集。除此兩翁相見外，不知三徑爲誰開。

送項判官

斷蘆洲渚落楓橋，渡口沙長過午潮。山鳥自呼泥滑滑，行人相對馬蕭蕭。十年長自青衿識，千里來非白  
壁招。握手祝君能強飯，華簪常得從雞翹。

次韻張德甫奉議

知君非我載醪人，終日相隨免汗茵。賞盡高山見流水，唱殘白雪值陽春。中分香積如來鉢，對現毗耶長  
者身。誰拂定林幽處壁，與君圖寫繼吾真。

寶公塔

道林眞骨葬青霄。窳塔千秋未寂寥。寶勢旁連大江起。尊形獨受衆山朝。雲泉別寺分三徑。香火幽人止一瓢。我亦鷲峯同聽法。歲時歌嘏豈辭遙。

覺海方丈

往來城府住山林。諸法脩然但一音。不與物違眞道廣。每隨緣起自禪深。舌根已淨誰能壞。足迹如空我得尋。歲晚北窗聊寄傲。蒲萄零落半牀陰。

道光泉

籀龍將雨繞山行。注遠投深靜有聲。雲涌浴槽朝自暖。虹垂齋鑊午還晴。銅瓶各滿幽人意。玉甃因高正士名。神力可嗟妨智巧。桔槔零落篔簹生。

登寶公塔

倦童疲馬放松門。自把長筇倚石根。江月轉空爲白晝。嶺雲分暝與黃昏。鼠搖岑寂聲隨起。鷗矯荒寒影對翻。當此不知誰客主。道人忘我我忘言。

重登寶公塔復用前韻二首

空見方墳涌半霄。難將生死問參寥。應身東返知何國。瑞像西歸自本朝。遺寺有門非輦路。故池無鉢但僧瓢。獨龍下視皆陳迹。追數齊梁亦未遙。

二

碧玉旋螺恍隔霄。冠山仙冢亦寥寥。空餘華構延風月。無復靈蹤落市朝。帳座追嚴多獻寶。供盤隨施有操瓢。他方出沒還如此。與物何心作邈遙。

紙暖閣

聯屏蓋障一尋方。南設鈎簾北置牀。側座對敷紅絮暖。仰牕分啓碧紗涼。氈廬易以梅蒸壞。錦幄終於草野妨。楚穀越藤真自稱。每糊因得減書囊。

雨花臺

盤互長干有絕陁。并包佳麗入江亭。新霜浦溆綿綿淨。薄晚林巒往往青。南上欲窮牛渚怪。北尋難忘草堂靈。便輿却走垂楊陌。已戴寒雲一兩星。

北牕

病與衰期每強扶。雞壑枯梗亦時須。空花根蒂難尋摘。夢境煙塵費掃除。耆域藥囊真妄有。軒轅經匱或元無。北窗枕上春風暖。漫讀毗耶數卷書。

小姑

小姑未嫁與蘭支。何恨流傳樂府詩。初學水仙騎赤鯉。竟尋山鬼從文狸。繽紛雲櫺空棠檝。綽約煙鬟獨桂旌。弄玉有祠終或往。飛瓊無夢故難知。

榮上人遽欲歸以詩留之

道人傳業自天台。千里翛然赴感來。梵行毗沙爲外護。法筵靈曜得重開。已能爲我迂神足。便可隨方長

聖胎肯顧北山如慧約與公西崦斲莓苔

呈陳和叔并序

嘉祐末和叔以集賢校理判登聞鼓院同知太常禮院皮場街有園數畝中置二棹輒袤丈北戶臨溝略  
徇通街旁作小屋毀輜車爲蓋某以直集賢院爲三司度支判官以知制誥糾察在京刑獄同管勾三班  
院間度徇飯車蓋下隨所有無坐臥輒上笑語常至夜如此三歲而和叔遭太夫人憂未幾某亦喪親以  
去時永昭陵尙未復土也後與和叔皆蒙今上拔用數會議語皆憂傷之餘責厚事叢無復故情元豐元  
年某食觀使祿居鍾山南和叔經略廣東道舊悵然某作詩以敘其事  
毀車爲屋僅容身三歲相要薄主人晝寓棹輒常至夜冬泐溝徇復尋春南陔不泊公歸里蒼墓垂成我  
喪親後會縱多無此樂山林投老一傷神

招呂望之使君

潮溝東路兩牛鳴十畝漪漣一草亭委質山林如許國寄懷魚鳥欲忘形紛紛易變浮雲白落落誰鍾老  
柏青尙有使君同好惡想隨秋水肯揚舲

公關枉道見過獲聞新詩因敘歎仰

青丘神父能爲政碧落僊翁好作詩舊事齊兒應共記新篇楚老得先知懷輒大峴如迎日供帳闔門勝  
去時若與鷗夷鬪百草錦囊佳麗敵西施

全椒張公有詩在北山西菴僧者邊之悵然有感

十年悵悵躡山阡。終欲持杯滴到泉。東路角巾非故約。西州華屋漫修椽。幽明永隔休炊黍。真俗相妨久絕弦。遺墨每看疑邂逅。復隨人事散如煙。

嶺雲

嶺雲合處小盤桓。人得敷衾馬解鞍。寒莢著天榆歷歷。淨華浮海桂團團。交游渙散淵明喜。吏卒蕭條叔夜寬。方丈老翁無一髮。更知來不爲皮冠。

蓼蟲

蓼蟲事業無餘習。芻狗文章不更陳。隱几自憐居喪我。倨堂誰覺似非人。難堪藏室稱中士。祇合箕山作外臣。尙有少緣灰未死。欲持新句惱比隣。

莫疑

莫疑禪伯未知禪。莫笑仙翁不學仙。靈骨肯傳黃蘗燼。真心自放赤松煙。蓮華世界何關汝。楮葉工夫浪費年。露鶴聲中江月白。一燈岑寂擁書眠。

卷十八

律詩 七言八句

示俞秀老



繚繞山如涌翠波。人家一半在煙蘿。時豐笑語春聲早。地僻追尋野興多。翠堵朱甍開北向。招提素脊隱西阿。暮年要與君攜手。處處相煩作好歌。

外廚遣火示公佐

刀匕初無欲清七姓切人。如何竈鬼尙嫌噴。脩脩短褐方煬。一作圍火。冉冉青煙已被宸。邂逅焚巢連鳥雀。倉黃濡幕愧比隣。王陽幸有囊衣在。報賞焦頭亦未貧。

讀眉山集次韻雪詩五首

若木昏昏未有鷗。凍雷深閉阿香車。搏雲忽散篔爲屑。翦水如分綴作花。擁篲尙憐南北巷。持杯能喜兩三家。戲按弄掬輸兒女。羔袖龍鍾手獨叉。

二

神女青腰寶髻鵷。獨藏雲氣委飛車。夜光往往多聯璧。白小紛紛每散花。珠網纒連拘翼座。瑤池淼漫阿環家。銀爲宮闕尋常見。豈卽諸天守夜叉。

三

惠施文字黑如鷗。於此機緘漫五車。嚼若易緇終不染。紛然能幻本無花。觀空白足寧知處。疑有青腰豈作家。慧可忍寒眞覺晚。爲誰將手少林叉。

四

寄聲三足阿環鷗。問訊青腰小駐車。一一照肌寧有種。紛紛迷眼爲誰花。爭妍恐落江妃手。耐冷疑連月

姊家長恨玉顏春不久。畫圖時展爲君叉。

五

戲搖微縞女。試咀流酥已頰車。歷亂稍埋冰揉粟。消沉時點水圓花。豈能舴艋真尋我。且與蝸牛獨臥家。欲挑青腰還不敢。直須詩膽付劉叉。

讀眉山集愛其雪詩能用韻復次韻一首

靚妝嚴飾曜金鷄。比興難工漫百車。水種所傳清有骨。天機能識嫩非花。嬋娟一色明千里。綽約無心熟萬家。長此賞懷甘獨臥。袁安交戟豈須叉。

八功德水

雪山馬口出琉璃。聞說諸天與護持。此水遙連八功德。供人真淨四威儀。當時迦葉無塵染。何事闕鄉有土思。道力起緣非一路。但知瓢飲是生疑。

寄題程公闢物華樓

吳楚東南最上游。江山多在物華樓。遙瞻旌節臨尊俎。獨臥柴荆阻獻酬。想有新詩傳素壁。怪無餘墨到滄州。馮涪南望重重綠。章水還能向此流。

酬俞秀老

灑掃東庵置一牀。於君獨覺故情長。有言未必輸摩詰。無法何曾泥飲光。天壤此身知共弊。江湖他日要相忘。猶貪半偈歸思索。却恐提桓妄揣量。

次韻吳冲卿召赴資政殿聽讀詩義感事冲卿詩云雪銷鳩鵲御溝融燕見殊恩綴上公晝日乍驚三接寵正風獲聽二南終解頭共仰天顏喜櫺面裁容聖域通午漏漸長知禹錫侍臣何術補堯聰時修撰經義所初進二南有旨資政殿讀云

周南麟趾聖人風未有騶虞繫召公雅頌兼陳爲四始笙歌合奏以三終討論詔使成書上休澣恩容著藉通牆面豈能知奧義延陵聽賞自爲聽

張待郎示東府新居詩因而和酬二首

得賢方慕北山萊赤白中天二府開功謝蕭規慚漢第恩從隗始詫燕臺曾留上主經過跡更費高人賦詠才自古落成須善頌掃除東閣望公來

二

榮觀流傳動草萊中官賜設上尊開鼓歌竚窳聽疑夢肴果聯翩餽有臺斧藻故應宜舊德棟梁非復稱凡材虛堂欲踵曹參事試問齊人或肯來

次韻冲卿上元從駕至集禧觀偶成

昭陵持橐從遊人更見熙寧第四春寶構中開移玉座華燈錯出映朱塵輦前時看新歌舞仗外還如舊微巡投老逢時追往事却含愁思度天津

次韻陪駕觀燈

繡篔含風下玉除宮商挾奏斐然殊福祥周室流爲火恩澤堯樽散在衢伏枕但能知廣樂揮毫何以報

明珠願留巾篋歸田日。追詠公歡每自娛。

和吳相公東府偶成

承華往歲幸躊躇。風月清談接緒餘。並轡趁朝今已老。連牆得屋喜如初。誅茅我夢江皋地。澆薤公思洛水渠。歛退故應容拙者。先營環堵祭牢蔬。

和蔡樞密孟夏旦日西府書事

宮闕初晴氣象饒。寶車攢轂會東朝。重輪慶自離明發。內壤陰隨解澤消。賜篋外廷紛錦繡。燕庖中禁續薪樵。聯翩入賀知君意。咫尺威顏不隔霄。

和蔡樞密賀平戎慶捷

城郭名王據兩陲。軍前一日送降旗。羌兵自此無傳箭。漢甲如今不解纍。幕府上功聯舊代。朝廷稱慶具新儀。周家道泰西戎喙。還見詩人詠串夷。

次韻奉和蔡樞密南京種山藥法蔡詩并序云。蒙見索南都種山藥法。并以生頭數十莖送上。輒成小詩。青青正是中分天。區種何妨試玉延。即見引須緣夏木。定知如躡薰冬筵。俗傳睡時以足按之。即如人足。潤還御水冰霜結。蔭近堯雲雨露偏。自裹自題還自媿。揆苗應笑宋人然。

區種拋來六七年。春風條蔓想宛延。難追老圃莓筍徑。空對珍盤玳瑁筵。嘉種忽傳河右壤。靈苗更長闕西偏。故畦穿斲知何日。南望鍾山一慨然。

次韻元厚之平戎慶捷來詩有何人更得通天帶。謀合君心只晉公之句。

朝廷今日四夷功。先以招懷後殲戎。胡地馬牛歸隴底。漢人煙火起湟中。投戈更講諸儒藝。免胄爭趨上將風。文武佐時慚吉甫。宣王征伐自膚公。

謁曾魯公即赴會時

翊戴三朝冕有蟬。歸榮今作地行仙。且開京闕一作洛蕭何第。未放江湖范蠡船。老景已鄰周呂尚。慶門方似漢韋賢。一觴豈足爲公壽。願賦長虹吸百川。

駕自啓聖還內

衣冠原廟漢家儀。羽衛親來此一時。天子當懷霜露感。都人亦歎鼓簫悲。紛紛瑞氣隨雲漢。漠漠榮光上日旗。塵土未驚闔闔閉。綠槐空覆影參差。

集禧觀池上詠野鵝

池上野鵝無數好。晴天鏡裏雪毳毵。似憐暄暖鳴相逐。疑戀寬閑去却回。京洛塵沙工點汗。江湖矰弋飽驚猜。羽毛的的人難近。嗟此謀身或有才。

次韻東廳韓侍郎齋居晚興

齋禁雖嚴異太常。蕭然高臥意何長。煙含欲暝宮庭紫。日映新秋省闕黃。壯節易摧行踽踽。華年相背去堂堂。追攀坐歎風塵隔。空聽鈞天夢帝鄉。

酬和甫祥源觀醮罷見寄

竊祿祠官久見容。每持金石薦宸衷。鈞天忽忽清都夢。方丈寥寥弱水風。知結勝緣人意外。想尋陳迹馬

踏中新詩起我超然興。更感鍾山蕙帳空。

和御製賞花釣魚

蔭幄晴雲拂曉開。傳呼仙仗九天來。披香殿上留朱輦。太液池邊送玉杯。宿蘂暖舍風浩蕩。戲鱗清映日徘徊。宸章獨與春爭麗。恩許賡歌豈易陪。

二

竊竊祥雲輦路晴。傳呼萬歲雜春聲。蔽虧玉仗宮花密。映燭金溝御水清。珠蘂受風天下暖。錦鱗吹浪日邊明。從容樂飲眞榮遇。願賦嘉魚頌太平。

次楊樂道韻六首

後殿朝次偶題

百年文物士優游。萬國今方似綴旒。發策東堂招儁乂。回輿北苑罷倡優。忽隨諸彥登龍尾。尙憶當年應鵠頭。獨望清光無補報。更慚虛食太官羞。

御溝

渺渺金河漲欲平。數支分綠報清明。常縈輦路漂花去。更引流杯送酒行。靜見金輿穿樹影。清含玉漏過牆聲。衰顏一照自多感。迴首江南春水生。

幕次憶漢上舊居

漢水泱泱繞鳳林。峴山南路白雲深。如何憂國忘家日。尙有求田問舍心。直以文章供潤色。未應風月負

登臨超然便欲遺榮去。却恐元龍會見侵。

後苑詳定書懷

文墨由來妙禁中。家傳豈獨賦河東。平生聽想風聲早。數日追隨笑語同。御水新如鴨頭綠。宮花更有鶴翎紅。看花弄水聊爲樂。不晚朝廷相弱翁。

上巳聞苑中樂聲書事

苑中誰得從春遊。想見漸臺瓦欲流。御水曲隨花影轉。宮雲低繞樂聲留。年華未破清明節。日暮初回祓禊舟。更覺至尊思慮遠。不應全爲拙倡優。

用樂道舍人韻書十日事呈樂道舍人聖從待制

東門人物亂如麻。想見新鞦韆照路華。午鼓已傳三刻漏。從官初賜一杯茶。忽忽殿下催分首。擾擾宮前聽賣花。歸去莫言天上事。但知呼客飲流霞。

詳定幕次呈聖從樂道

殿閣掄材覆等差。從臣今日擅文華。揚雄識字無人敵。何遜能詩有世家。舊德醉心如美酒。新篇清目勝眞茶。一觴一詠相從樂。傳說猶堪異日誇。

崇政殿詳定幕次偶題

嬌雲漠漠護層軒。嫩水濺濺不見源。禁柳萬條金細撚。宮花一段錦新翻。身閑始更知春樂。地廣還同避世喧。不恨玉盤冰未賜。清談終日自蠲煩。

詳定試卷二首

簾垂咫尺斷經過。把卷空聞笑語多。論衆勢難專可否。法嚴人更謹誰何。文章直使看無類。勳業安能保不磨。疑有高鴻在寥廓。未應迴首顧張羅。

二

童子常誇作賦工。暮年羞悔有揚雄。當時賜帛倡優等。今日論才將相中。細甚客卿因筆墨。卑於爾雅注魚蟲。漢家故事真當改。新詠知君勝弱翁。

奉酬楊樂道

邂逅聯裾殿閣春。却愁容易卽離羣。相知不必因相識。所得如今過所聞。近代聲名出盧駱。前朝筆墨數淵雲。與公家世由來事。愧我初無百一分。

奉酬聖從待制

班行想望歲空多。知有龍門未敢過。和近聖人師展季。勇爲君子盜荆軻。三刀舊協庭闈夢。五袴今傳里巷歌。復道諫書嘗滿篋。不唯詩句似陰何。

次韻吳仲庶省中畫壁

畫史雖非顧虎頭。還能滿壁寫滄洲。九衢京洛風沙地。一片江湖草樹秋。行數鱸魚賓共樂。臥看鷗鳥吏方休。知君定有扁舟意。却爲丹青肯少留。

夜讀試卷呈君實待制景仁內翰



篝燈時見語驚人。更覺揮毫捷有神。學問比來多可喜。文章非特巧爭新。蕉中得鹿初疑夢。牖下窺龍稍眩真。邂逅兩賢時所服。坐令孤朽得相因。

答張奉議

五馬渡江開國處。一牛吼地作菴人。結蟠茅竹纔方丈。穿築溝園未過旬。我久欲忘言語道。君今來見句文身。思量何物堪酬對。棒喝如今總不親。

卷十九

律詩 七言八句

次韻和吳仲庶池州齊山畫圖

知制誥時作

省中何忽有崔嵬。六幅生綃坐上開。指點便知巖石處。登臨新作使君來。雅懷重向丹青得。勝勢兼隨翰墨回。更想杜郎詩在眼。一江春雪下離堆。

次韻祖擇之登紫微閣二首

漠漠秋陰護掖垣。青雲祇在兩楹間。宮樓唱罷雞人遠。門闕朝歸虎士閑。華蓋北瞻天帝座。蓬萊東想道家山。却慚久此隨諸彥。文采初無豹一斑。

二

掖門相對敞銅銀。鸞鸞飛甍在兩間。潤色平生知地禁。登臨此日愧身閑。浮雲倒影移窗隙。落木回飈動

屋山忽憶初來秋，尙早紫微花點綠苔斑。

送沈興宗察院出使湖南

諫書平日阜囊中，朝路爭看一馬騶。  
漢節飽曾衝海霧，楚帆聊復借湖風。  
皇華命使今爲重，直道酬君遠亦同。  
投老承明無補助，得爲湘守卽隨公。

春風

一馬春風北首燕，却疑身得舊山川。  
陽浮樹外滄江水，塵漲原頭野火煙。  
日借嫩黃初著柳，雨催新綠稍歸田。  
回頭不見辛夷發，始覺看花是去年。

永濟道中寄諸舅弟

燈火忽忽出館陶，回看永濟日初高。  
似聞空舍烏鳥樂，更覺荒陂人馬勞。  
客路光陰真棄置，春風邊塞祇蕭騷。  
辛夷樹下烏塘尾，把手何時得汝曹。

道逢文通北使歸

朱顏使者錦貂裘，笑語春風入貝州。  
欲報京都近消息，傳聲車馬少淹留。  
行人盡道還家樂，騎士能吹出塞愁。  
回首此時空慕羨，驚塵一段向南流。

將次相州

青山如浪入漳州，銅雀臺西八九丘。  
螻蟻往還空壘畝，麒麟埋沒幾春秋。  
功名蓋世知誰是，氣力迴天到此休。  
何必地中餘故物，魏公諸子分衣裘。

次韻平甫喜唐公自契丹歸予辭北使而唐公代往

留犂撓酒得戎心。繡袷通歡歲月深。奉使由來須陸賈。離親何必強曾參。燕人候望空甌脫。胡馬追隨出隴林。萬里春風歸正好。亦逢佳客想揮金。

尹村道中

滿眼霜吹宿草根。謾知新歲不逢春。却疑青嶂非人世。更覺黃雲是塞塵。萬里張侯能奉使。百年曾子肯辭親。自憐許國終無用。何事紛紛客此身。

次韻王勝之詠雪

萬戶千門車馬稀。行人却返鳥休飛。玲瓏翦水空中墮。的皪裝春樹上歸。素髮聯華驚老大。玉顏爭好羨輕肥。朝來已賀豐年瑞。更問田家果是非。

次韻酬府推仲通學士雪中見寄

朝來看雪詠君詩。想見朱衣在赤墀。爲問火城將策試。何如雲屋聽臆知。曲牆稍覺吹來密。窮巷終憐掃去遲。欲訪故人非興盡。自緣無路得傳卮。

次韻宋次道憶太平早梅

大梁春費寶刀催。不似湖陰有早梅。今日盤中看翦綵。當時花下就傳杯。紛紛自向江城落。杳杳難隨驛使來。知憶舊游還想見。西南枝上月徘徊。

和曾子翊授舒掾之作

皖城終歲靜如山。府掾應從到日閑。一水碧羅裁繚繞。萬峯蒼玉刻孱顏。舊游筆墨苔今老。浪走塵沙鬢已斑。攬轡羨君橋北路。春風枝上鳥關關。

送劉和父奉使江西

劉郎今日擁旌麾。傳到江南喜可知。上冢還須擊羊豕。下車應不問狐狸。無人敢效一作勸公榮酒。爲我聊尋逸少池。亦見嶺頭花爛漫。更將春色寄相思。

次韻張子野竹林寺二首

澗水橫斜石路深。水源窮處有叢林。青鴛幾世開蘭若。黃鶴當年瑞卯金。敗壁數峯連粉墨。涼煙一穗起檀沈。十年親友半零落。回首舊游成古今。

二

京峴城南隱映深。兩牛鳴地得禪林。風泉隔屋撞哀玉。竹月緣堦貼碎金。藻井仰窺塵漠漠。青燈對宿夜沈沈。扁舟過客十年事。一夢此山愁至今。

送吳龍圖知江寧

才高明主睠方深。屬郡聞風自革心。閭里不須多按治。山川從此數登臨。茅簷坐隔雲千里。柏壘初抽翠一尋。東望泫然知有寄。但疑公豈久分襟。

送直講吳殿丞宰鞏縣

青嵩碧洛曾遊地。墨綬銅章忽在身。擁馬尙多畿甸雪。隨衣無復禁城塵。古來學問須行己。此去風流定

慰人更憶少陵詩。上語知君不負鞏梅春。

送真州吳處厚使君

江上齋船駐彩橈。鳴笳應滿綠楊橋。久爲漢史知文法。當使淮人服教條。拱木延陵瞻故國。叢祠瓜步認前朝。登臨莫負山川好。終欲東歸聽楚謠。

送李質夫之陝府

平世求才漫至公。悠悠羈旅士多窮。十年見子尙短褐。千里隨人今北風。戶外屨貧虛自滿。樽中酒賤亦常空。共嫌欲老無機械。心事還能與我同。

題儀真致政孫學士歸來亭

彭澤陶潛歸去來。素風千歲出塵埃。明時雋老心無累。故里高門子有才。更作園林負城郭。常留花月映池臺。却尋五柳先生傳。柴水區區但可哀。

次韻吳季野題岳上人澄心亭

高亭五月尙寒生。回首塵沙自鬱蒸。砌水亂流穿石底。檻雲高出蔽山層。躋攀欲絕人間世。締搆知從物外僧。腸胃坐來清似洗。神奇未怪佛圖澄。

送彥珍

挾筴窮鄉滿鬢絲。陂田荒盡豈嘗窺。未應谷口終身隱。正合菑川舉國推。握手百憂空往事。還家一笑卽芳時。柘岡定有辛夷發。亦見東風使我知。

寄張先郎中

留連山水住多時。年比馮唐未覺衰。篝火尚能書細字。郵筒還肯寄新詩。胡牀月下知誰對。蠻榼花前想自隨。投老主恩聊欲報。每瞻高躅恨歸遲。

汜水寄和甫

虎牢關下水逶迤。想汝飄然過此時。灑血祇添波浪起。脫身難借羽翰追。留連厚祿非朝隱。乖隔殘年更土思。已卜冶城三畝地。寄聲知我有歸期。

寄黃吉甫

朱顏去似朔風驚。白髮多於野草生。挾筴讀書空有得。求田問舍轉無成。解鞍烏石岡邊坐。攜手辛夷樹下行。今日追思真樂事。黃塵深處走雞鳴。

次韻平甫村墅春日

昨日青青尙未齊。忽看春色滿高低。陂梅弄影爭先舞。葉鳥藏身自在啼。樵蹻踏雲歸舊徑。漁篋背雨向前溪。似知我欲逃軒冕。談笑相過各有攜。

卽席次韻微之泛舟

畫舸幽尋北果園。應將陳迹問桑門。地隨牆墅行多曲。天著岡巒望易昏。故國時平空有木。荒城人少半爲村。悠悠興廢皆如此。賴付乾愁酒一罇。

示長安君

少年離別意非輕。老去相逢亦愴情。草草杯盤供笑語。昏昏燈火話平生。自憐湖海三年隔。又作塵沙萬里行。欲問後期何日是。寄書應見鴈南征。

和平甫招道光法師

練師投老演真乘。像劫空王爪與肱。於總持門通一路。以光明藏續千燈。從容發口酬摩詰。邂逅持心契慧能。新句得公還有賴。古人詩字恥無僧。

和祖仁晚過集禧觀

妍暖聊隨馬首東。春衫猶未著方空。煙霞送色歸瑤水。山木分香繞闥風。壯髮已輸塵外綠。衰顏漫到酒邊紅。日斜歸去人間世。却記前遊似夢中。

程公闢轉運江西

江西一節鑄黃金。最慰漳濱父老心。長孺向來真強子。次公今不異重臨。餘風尙有歡謠在。陳迹非無勝事尋。豫想新詩能寄我。十年華省故情深。

次韻微之卽席

釀成吳米野油囊。卻愛清談氣味長。閑日有僧來北阜。平時無盜出南塘。風亭對竹酬孤峭。雪逕尋梅認暗香。江水中濡應未變。一杯終欲就君嘗。

和王微之秋浦望齊山感李太白杜牧之

齊山置酒菊花開。秋浦聞猿江上哀。此地流傳空筆墨。昔人埋沒已蒿萊。平生志業無高論。末世篇章有

逸才尙得使君驅五馬，與尋陳迹久徘徊。

次韻王微之登高齋

臺殿荒墟辱井堙，豪華不復見臨春。北山漠漠雲垂地，南埭悠悠水映人。馳道蔽虧松半死，射場埋沒雉多馴。登高一曲悲亡國，想繞紅梁落暗塵。

和微之重感南唐事

叔寶傾陳衍弊梁，可嗟曾不見興亡。齋祠父子終身費，酣詠君臣舉國荒。南狩皖山非故地，北師淮水失名王。天移四海歸真主，誰誘昏童肯用良。

李君昇弟訪別長蘆至淮陰追寄

怒水憑風雪壘高，亂流追我祇魚舠。忽看淮月臨寒食，想映江春聽伯勞。道義當成麟一角，文章已禿兔千毫。後生可畏吾知子，南北何時見兩髦。

貴州虞部使君訪及道舊竊有感惻因成小詩

韶山秀拔江清寫，氣象還能出搢紳。當我垂髫初識字，看君揮翰獨驚人。郵籤忽報旌麾入，齋閣遙瞻組綬新。握手更誰知往事，同時諸彥略成塵。

冲卿席上得行字

二年相值喜同聲，並轡塵沙眼亦明。新詔各從天上得，殘樽同向月邊傾。已嗟後會歡難必，更想前官責尙輕。黽勉敢忘君所勗，古人憂樂有違行。



示董伯懿

穿橋度塹祇閑行。詠石嘲花亦漫成。嚼蠟已能忘世味。畫脂那更惜時名。長千里北寒山紫。白下門西野水明。此地一廬須卜築。故人他日訪柴荆。

卷二十

律詩 七言八句

思王逢原三首

布衣阡陌動成羣。卓犖高才獨見君。杞梓豫章蟠絕壑。騏驎躡跨浮雲。行藏已許終身共。生死那知半路分。便恐世間無妙質。鼻端從此罷揮斤。

二

蓬蒿今日想紛披。冢上秋風又一吹。妙質不爲平世得。微言唯有故人知。廬山南墮當書案。湓水東來入酒卮。陳迹可憐隨手盡。欲歡無復似當時。

三

百年相望濟時功。歲路何知向此窮。鷹隼奮飛凰羽短。騏驎埋沒馬羣空。中郎舊業無兒付。康子高才。婦同。想見江南原上墓。樹枝零落紙錢風。

和吳御史臨淮感事

柵鑠城扉曉一開。施牙車軸轉成雷。黃塵欲礙龜山出。白浪空分汴水來。澄觀有材邀昧陋。霽雲無力報  
紆回。騷人此日追前事。悲氣隨風動管灰。

和文叔溢浦見寄

多難漂零歲月賒。空餘文墨舊生涯。相看楚越常千里。不及朱陳似一家。髮爲感傷無翠葆。眼從瞻望有  
玄花。唯詩與我寬愁病。報爾何妨賦棣華。

次韻吳季野再見寄

衣裘南北弊風塵。志趣卑汙已累親。流俗尙疑身察察。交遊方笑黨頻頻。遠同魚樂思濠上。老使鷗鷺恥  
海濱。邂逅得君還恨晚。能明吾意久無人。

次韻平甫贈三靈山人程惟象

家山松菊半荒蕪。杖策窮年信所如。占見地靈非卜筮。算知人貴自陶漁。久諳郭璞言多驗。老比顏含意  
更疎。祇欲勒成方士傳。借君名姓在新書。

次韻和甫詠雪

奔走風雲四面來。坐看山壘玉崔嵬。平治險穢非無德。潤澤焦枯是有才。勢合便疑包地盡。功成終欲放  
春回。寒鄉不念豐年瑞。只憶青天萬里開。

次韻張氏女弟詠雪

天上空多地。上稀。初寒風力故應微。那能鎮壓黃塵起。強欲侵凌白日飛。邑犬橫來矜意氣。窟蟾偷出助

光輝都城只有袁安憊。我亦年年幸賜衣。

次韻徐仲元詠梅二首

溪杏山桃欲占新。高梅放蕊尙嬌春。額黃映日明飛燕。肌粉含風冷太真。玉笛悲涼吹易散。冰紈生澀畫難親。爭妍喜有君詩在。老我一作我老。儻然敢效顰。

二

舊挽青條冉冉新。花遲亦度柳前春。肌冰綽約如姑射。膚雪參差是太真。搖落會應傷歲晚。攀翻曠欲寄情親。終無驛使傳消息。寂寞知誰笑與顰。

詩呈節判陸君名彥回

中郎筆墨妙他年。晚與君遊喜象賢。款款故情初未慙。飄飄新句總堪傳。英才但未遭文舉。明主寧當弃浩然。投贈臨分加組麗。小詩能不強雕鐫。

留題曲親益山和州曲叙

巧與天成未覺殊。國工施手豈須臾。根連滄海蓬萊闕。勢壓黃河砥柱孤。坐上煙嵐生紫翠。影中樓閣見青朱。爲山觀水皆良喻。誰向君家識所趨。

不到太初兄所居遂已十年以詩攀寄

一水衣巾翦翠綃。九峯環珮刻青瑤。生才故有山川氣。卜築兼無市井囂。三葉素風門闕在。十年陳迹履綦銷。歸榮早晚重攜手。莫負幽人久見招。

偶成二首

漸老偏諳世上情。已知吾事獨難行。脫身負米將求志。勦力求田豈爲名。高論頗隨衰俗廢。壯懷難值故人傾。相逢始覺寬愁病。搔首還添白髮生。

二

懷抱難開醉易醒。曉歌悲壯動秋城。年光斷送朱顏去。世事栽培白髮生。三畝未成幽處宅。一身還逐衆人行。可憐蝸角能多少。獨與區區觸事爭。

雨過偶書

霽。甘澤洗塵寰。南畝東郊共慰顏。地望歲功還物外。天將生意與人間。霽分星斗風雷靜。涼入軒窗枕簟閒。誰似浮雲知進退。纔成霖雨使歸山。

季春上旬苑中卽事

輦路行看斗柄東。簾垂殿閣轉春風。樹林隱翳燈含霧。河漢欹斜月墜空。新蕊漫知紅簌簌。舊山常夢直叢叢。賞心樂事須年少。老去應無日再中。

上西垣舍人

共說才高世所珍。諸賢誰敢望先塵。討論潤色今爲美。學問文章老更醇。賦擬相如真復似。詩看子建的應親。仍聞悟主言多直。許史家兒往往嗔。

退朝

門外鳴騶送響頻。披衣強起赴鷄人。火城夜闌雲藏闕。玉座朝寒雪被宸。邂逅欲成雙白鬢。蕭條難得兩朱輪。猶憐退食親朋在。相與吟哦未厭貧。

與微之同賦梅花得香字三首

漢宮嬌額半塗黃。粉色凌寒透薄粧。好借月魂來映燭。恐隨春夢去飛揚。風亭把盞酬孤豔。雪徑回輿認暗香。不爲調羹應結子。直須留此占年芳。

二

結子非貪鼎鼐嘗。偶先紅杏占年芳。從教臘雪埋藏得。卻怕春風漏洩香。不御鉛華知國色。祇裁雲縷想仙裝。少陵爲爾牽詩興。可是無心賦海棠。

三

淺淺池塘短短牆。年年爲爾惜流芳。向人自有無言意。傾國天教抵死香。鬚臆黃金危欲墮。蒂團紅蠟巧能裝。嬋娟一種如冰雪。依倚春風笑野棠。

和晚菊

不得黃花九日吹。空看野葉翠葳蕤。淵明酩酊知何處。子美蕭條向此時。委翳似甘終草莽。栽培空欲傍藩籬。可憐峰蝶飄零後。始有閑人把一枝。

景福殿前柏

香葉由來耐歲寒。幾經眞賞駐鳴鑾。根通御水龍應蟄。枝觸宮雲鶴更盤。怪石誤蒙三品號。老松先得大

夫官知君勁節無榮慕。寵辱紛紛一等看。

四月果

一春強半勒花風。幾日園林幾樹紅。汲汲追攀常恨晚。紛紛吹洗忽成空。行看果下蒼苔地。已作人間白髮翁。豈惜解鞍留夜飲。此身醒醉與誰同。

牆西樹

牆西高樹結陰稠。步履窮年向此留。白日屢移催我老。清風一至使人愁。紛紛暝鳥驚遠合。渺渺涼蟬咽欲休。回首舊林歸未得。看看知復幾春秋。

度磨嶺寄莘老

區區隨傳換冬春。夜半懸崖託此身。豈慕王尊能許國。直緣毛義欲私親。施爲已壞生平學。夢想猶歸寂寞濱。風月一歌勞者事。能明吾意可無人。

狄梁公陶淵明俱爲彭澤令。至今有廟在焉。刁景純作詩見示。繼以一篇。嘉祐中提點江東刑獄時作。

梁公壯節就夔魑。陶令清身託酒徒。政在房陵成底事。年稱甲子亦何須。江山彭澤空遺像。歲月柴桑失故區。末俗此風猶不競。詩翁歎息未應無。

寄沈鄱陽時爲江東提刑

離家當日尙炎風。叱馭歸時九月窮。朝渡藤溪霜落後。夜過磨嶺月明中。山川道路良多阻。風俗謠言苦

未通。唯有番君人共愛。流傳名譽滿江東。

送裴如晦宰吳江

青髮朱顏各少年。幅巾談笑兩愀然。柴桑別後餘三徑。天祿歸來盡一廛。邂逅都門誰載酒。蕭條江縣去鳴弦。猶疑甫里英靈在。到日憑君爲艤船。

次韻樂道送花

沁水名園好物華。露盤分送子雲家。新粧欲應何人面。彩筆知書幾葉花。曾和郢中歌白雪。亦陪天上飲流霞。春風已得同心賞。更擬攜詩載酒誇。

籌思亭在江東轉運司南廳後園

昔人何計亦何思。許國憂民適此時。寓與中園爲遠趣。託名華榜有新詩。數株碧柳蒼苔地。一丈紅蕖綠水池。坐聽楚謠知歲美。想銜杯酒問花期。

愁臺

頽垣斷壑有平沙。老木荒榛八九家。河勢東南吹地坼。天形西北倚城斜。傾壺語罷還登眺。岸幘詩成卻嘆嗟。萬事因循今白髮。一年容易卽黃花。

和正叔懷其兄草堂

茆堂竹樹水之濱。耕稼逍遙似子真。小吏一身今倦宦。先生三畝獨安貧。欲拋縣印辭黃綬。來伴山冠戴白綸。祗恐明時收士急。不容家有兩閑人。

鄭子憲西齋

漫搆軒窗意亦深。滔滔浮俗倦登臨。詩書千載經綸志。松竹四時蕭洒心。曉枕不容春夢到。夜燈唯許月華侵。行看富貴酬勤苦。車馬重來拾翠陰。

寄題思軒

名郎此地昔徘徊。天誘良孫接踵來。萬屋尙歌餘澤在。一軒還向舊堂開。右軍筆墨空殘沼。內史文章祗廢臺。邑子從今誇勝事。豈論王謝世稱才。

陳君式大夫恭軒

恭軒靜對北堂深。新斲檀欒一畝陰。膝下往來前日事。眼中封植去年心。每懷罇學沾餘瀝。獨喜弦歌有嗣音。肯構會須門閥大。世資何用滿籛金。

寄黃吉甫

學兼文武在吾曹。別後應看虎豹韜。欲問廟堂誰鎮撫。尙傳邊塞敢驚騷。旌旗急引飛黃下。時發騎士南征烽火遙。連太白高聞說荆人亦憔悴。家家還願獻春醪。

高魏留

魏留十七助防邊。埋沒鹽州十八年。衣履窮空委胡婦。糗糧辛苦待山田。關河舊路頻回首。腹背他時兩受鞭。邂逅得歸耶戰死。母隨人去亦蕭然。

丁年



丁年結客盛遊從。宛洛氈車處處逢。吟盡物華愁筆老。醉消春色愛醅濃。墟間寂寞相如病。鍛處荒涼叔夜慵。早晚青雲須自致。立談平取徹侯封。

卷二十一

律詩七言八句

送王詹叔利州路運判

王孫舊讀五車書。手把山陽太守符。未駕朱轡辭輦轂。卻分金節佐均輸。人才自古常難得。時論如君豈久孤。去去便看歸奏事。莫嗟行路有崎嶇。

送周仲章使君

看君東下雪溪船。迴首紛紛已五年。簪筆少留吾所望。剖符輕去此何緣。高麾行路穿秦樹。駿馬歸時著蜀鞭。子墨文章應滿篋。承明宣室正詳延。

送王蒙州

請郡東南促去程。拍堤江水照紅旌。仁聲已逐春風到。使節猶占夜斗行。箭落阜鵬羸兔避。句傳炎海鱷魚驚。麒麟不是人間物。漢詔先應召賈生。

送龐簽判

北都兩去不辭勤。仕路論材況出羣。一相開藩嘗負弩。三年通籍更從軍。清談猶得當時事。遺愛應從此

日聞我憶荆溪山最樂。看君摩翮上青雲。

送潘景純

東都會以一當千。場屋聲名十五年。晚賜綠衣隨宦牒。始操丹筆事戎旃。明時正欲精蒐選。榮路何當力薦延。賴有史君能好士。方看一鶚在秋天。

送僧無惑歸鄱陽

晚扶衰憊寄人間。應接紛紛祇強顏。挂席每諳東匯水。採芝多夢舊遊山。故人獨往今爲樂。何日相隨我亦閑。歸見江東諸父老。爲言飛鳥會知還。

送遜師歸舒州

山川相對一悲翁。往事紛紛夢寐中。邂逅故人恩意在。低徊今日笑言同。看吹陌上楊花滿。忽憶巖前蕙帳空。亦見桐鄉諸父老。爲傳衰颯病春風。

寄育王大覺禪師

單已安那示入禪。草堂難望故依然。山今歲暮終岑寂。人更天寒最靜便。隱蹟亦知甘自足。憑心豈吝客慰相憐。所聞不到荆門耳。人老禾新又一年。

寄無爲軍張居士

南陽居士月城翁。曾習禪那問色空。卓犖想超文字外。低徊卻寄語言中。真心妙道終無二。末學殊方自不同。此理世間多未悟。因君往往嘆西風。

次韻酬鄧子儀二首

青溪相值各青春。老去臨流輒損神。事事只隨波浪去。年年空得鬢毛新。論心未忍遺橫目。干世還憂近逆鱗。嘉句感君邀我厚。自嗟才不異常人。

二

金陵邂逅府東偏。手得新蒲每共編。采石偶耕垂百日。青溪並釣亦三年。君才有用方求祿。我志無成稍問田。一笑欲論心迹事。白頭相就且欷眠。

送李璋

湖海聲名二十年。尙隨鄉賦已華顛。却歸甫里無三徑。擬傍胥山就一廛。朱轂風塵休悵望。青鞋雲水且留連。故人亦見如相問。爲道方尋木鴈篇。

送章宏

道合由來不易謀。豈無和氏識荆璆。一川濁水浮文鷁。千里輕帆落武丘。身退豈嫌吾道進。學成方悟衆人求。西風乞得東南守。杖策還能訪我不。

別葛使君

邑屋爲儒知善政。市門多粟見豐年。追攀更覺相逢晚。談笑難忘欲別前。客幙雅遊皆置榻。令堂清坐亦鳴弦。輕舟後夜滄江北。迴首春城空黯然。

送王龍圖守荆南

壯志高才偃一藩。更嗟賢路此時難。長幡欲動何妨屈。老驥能行豈易閑。沙市放船寒月白。洛宮留御古苔斑。知公未厭還隨詔。歸看功名重太山。

次韻酬宋中散二首

初見彤庭賜履雙。便參東閣寄南邦。時聞正論除疑網。每讀高辭折慢幢。陳迹欲尋無復日。舊恩思報有如江。風流今見佳公子。投老心旌一片降。

二

超然京洛諒難雙。處在家庭譽在邦。道義門中窺戶牖。風騷壇上見麾幢。素書款款誰憐杜。彩筆迢迢獨勝江。信美賢公有才子。篤誠真復頌龍降。

和宋太博服除還朝簡諸朋舊

呼門初起外廷臣。秀氣稜稜動搢紳。談論坐來能慰我。篇章傳出亦驚人。生芻一束他年闕。伐木相求此地新。便欲與君同樂處。窮通餘事不關身。

次韻酬宋玘六首

洗雨吹風一月春。山紅漫漫綠紛紛。袞裳遠野誰從我。散策空陂忽見君。青眼坐傾新歲酒。白頭追誦少年文。因嗟涉世終無補。久使高材壅上聞。

二

東風渺渺客天涯。病眼先春已見花。遠欲報君羞強聒。老知隨俗厭雄誇。窮通往事真如夢。得失秋毫豈

更嗟邂逅故人。唯有醉醉中衣幘任欹斜。

三

城中燈火照青春。遠引吾方避糾紛。遊衍水邊追野馬。嘯歌林下應山君。愁尋徑草無求仲。喜對簷花有廣文。邂逅一樽聊酩酊。聲名身後豈須聞。

四

遠迹荒郊謝雋豪。春風誰與駐千旄。故交重趼恩何厚。新句連篇韻更高。美似狂醒初噉蔗。快如衰病得觀濤。久知坏冶成天巧。豈與人間共一陶。

五

無能私願祗求田。時物安能學計然。鑿井未成歌擊壤。射熊猶得夢鈞天。遙思故國歸來日。留滯新恩已去年。攜手與君遊最樂。春風陂上水濺濺。

六

山陂疇昔從吾親。諸父先生各佩紛。零落長年誰語此。遲回故地却逢君。衣冠偶坐論經術。襤褸當時刺繡文。更怪高材終未遇。有司何日選方聞。

寄吳正仲卻蒙馬行之都官梅聖俞太博和寄依韻酬之

山水玄暉去後空。騷人還向此間窮。小詩聊與論孤憤。大句安知辱兩雄。秦甲久愁荆劍利。趙兵今窘漢旗紅。背城不敢收餘燼。馬首翩翩只欲東。

寄平甫

少時爲學豈身謀。欲老低徊各自羞。乘馬從徒真擾擾。求田問舍轉悠悠。弦歌舊國平生樂。鞍馬新年幾日留。坐想搖鞭揚柳路。春風先我入皇州。

次韻舍弟常州官舍應客

霜雪紛紛上鬢毛。憂時自悔目空蒿。桑麻祇欲求三畝。勢利誰能算一毫。此地舊傳公子札。吾心真慕伯成高。飄然更有乘桴興。萬里寒江正復艚。

舟還江南阻風有懷伯兄

幾時重接汝南評。兩槳留連不計程。白浪黏天無限斷。玄雲垂野少晴明。平臯望望欲何向。薄宦嗟嗟空此行。會有開樽相勸日。鵲鴿隨處共飛鳴。

同陳伯通錢材翁遊山二君有詩因次元韻

秋來閑興每登臨。因叩精藍望碧岑。強策羸驂尋水石。忽驚幽鳥下煙林。同時覽物悲歡異。自古忘名趣向深。安得湖山歸我手。靜看雲意學無心。

夢張劍州

萬里憐君蜀道歸。相逢似喜語還悲。江淮別業依前處。日月新阡卜幾時。自說曲阿猶未穩。卽尋滙水去猶疑。茫然卻是陳橋夢。昨日春風馬上思。

酬慕容員外嘗爲王宮教授。以武舉入宮被。

初駕王門學者師。晚漂湖海衆人悲。吹毛未識腰間劍。刺股猶藏袖裏錐。衛霍功名還有命。蘇張才氣久非時。江尤亦見應須飲。莫放窮愁入兩眉。

次韻張唐公馬上

揭節初悲力不任。賜身終愧謬恩臨。病來氣弱歸宜早。偷取官多責恐深。膏澤未施空謗怨。瘡痍猶在豈謳吟。黃昏信馬江城路。欲訪何人話此心。

和王司封會同年

收科天陞復同時。回首相歡事亦稀。追講舊遊犀塵脫。交酬新唱彩牋飛。直須傾倒罇中酒。休惜淋漓坐上。衣日暮主翁留客轄。會稽聊滯買臣歸。

次韻酬子玉同年子玉詩云。過盡金湯知帝策。見求貂虎識軍儀。男兒本有四方志。祇在蓬瀛恐不知。

盛德無心漠北窺。蕃胡亦恐勢方羸。塞垣高壘深溝地。幕府輕裘緩帶時。趙將時皆思李牧。楚音身自感鍾儀。慚君許我論邊鎖。俎豆平生卻少知。

和舍弟舟上示沈道源

還裝欲盡喜舟輕。更喜嘉賓伴此行。野飲不忘魚可釣。旅羹何惜鴈能鳴。西山壯馬先歸牧。南穴殘梟欲就烹。愛國自多廊廟宰。與君詩酒盡交情。

過山卽事

卻過茲山已九年。江湖身世只飄然。曲城丘墓心空折。鹽步庭闈眼欲穿。慘慘野雲生隴底。蕭蕭飢馬立風前。轉多愁思催華髮。早晚輕舟上秀川。

酬裴如晦

二年羈旅越人吟。乞得東南病更侵。傷子未安莊氏義。壽親還慰魯侯心。鮮鮮細菊霜前蕊。漠漠疎桐日下陰。濁酒一杯秋滿眼。可憐同意不同斟。

酬鄭闕中

蕭條行路欲華顛。迴首山林尚渺然。三釜祇知爲養急。五漿非敢在人先。文章滿世吾誰慕。行義如君衆所傳。宜有至言來助我。可能空寄好詩篇。

寄余溫卿

雲散風流不自禁。天涯無路盍朋簪。空馳上國青泥信。誰和南山白石音。平日離愁寬帶眼。訖春歸思滿琴心。終回一命翩翩駕。獨過稽山鍛樹陰。

寄郎侍郎

兩朝人物歎賢豪。凜凜清風晚見褒。江漢但歸滄海闊。丘陵難學太山高。放懷詩酒機先息。迴首功名世自勞。久願作公樽俎客。恨無三畝斲蓬蒿。

送道光法師住持靈巖

靈巖開闢自何年。草木神奇鳥獸仙。一路紫苔通窅窅。千崖青靄落潺潺。山祇嘯聚荒禪室。象衆低摧想



法筵雪足莫辭重。趺往東人香火有因緣。

卷二十二

律詩 七言八句

奉酬永叔見贈

欲傳道義心猶在。一作雖壯強學一作學作文章力已窮。他日若能窺孟子。終身何敢望韓公。摳衣最出諸生後。倒屣嘗傾廣座中。祗恐虛名因此得。嘉篇爲貺豈宜蒙。

送陳舜俞制科東歸

諸賢發策未央宮。獨得菑川一老翁。曲學暮年終漢相。高談平日漫周公。君今壯歲收科第。我欲它時看事功。聞說慨然真有意。贈行聊似古人風。

送何正臣主簿

何郎冰雪照青春。應敵皆言筆有神。魯國儒人何獨少。元君畫史故應真。百年冠蓋風雲會。萬里山川日月新。可但諸公能品藻。會須天子擢平津。

與舍弟華藏院此君亭詠竹

一逕森然四座涼。殘陰餘韻去何長。人憐直節生來瘦。自許高材老更剛。曾與蒿藜同雨露。終隨松柏到冰霜。煩君惜取根株在。欲乞伶倫學鳳凰。

上元戲呈貢父

車馬紛紛白晝同。萬家燈火暖春風。別開閭闔壺天外。特起蓬萊陸海中。盡取繁華供俠少。祗分牢落與衰翁。不知太乙遊何處。定把青藜獨照公。

次韻楊樂道述懷之作

素心非不慕前修。自怪因循欲白頭。獵較趣時終瑣瑣。畫墁營職信悠悠。濠梁最憶知魚樂。牢筴翻慚爲麩謀。尙有故人能慰我。詩成珠玉每相投。

和楊樂道見寄

宅帶園林五畝餘。蕭條還似茂陵居。殺青滿架書新繕。生白當牕室久虛。孤學自難窺奧密。重言猶得慰空疎。相思每欲投詩社。只待春蒲葉又書。

寄吳冲卿二首

平生身事略相同。三歲連牆左廡中。更得謬恩分省舍。又將衰鬢作隣翁。聯翩久傍官槐綠。契闊今看楚蓼紅。不欲與君爲遠別。沙臺吹帽約秋風。

二時吳晉州方得舉

塞垣花氣欲飛浮。眼底紛紛綠漸抽。悠遠山川嗟我老。急難兄弟想君愁。舊知白日諸曹滿。試問紅燈幾客留。時節只應無意思。亦如行路判春休。

酬冲卿見別

同官同齒復同科。朋友婚姻分最多。兩地塵沙今齟齬。二年風月共婆娑。朝倫孰與君材似。使指將如我病何。升黜會應從此異。願偷閑暇數經過。

次御河寄城北會上諸友

客路花時祗攪心。行逢御水半晴陰。背城野色雲邊盡。隔屋春聲樹外深。香草已堪回步履。午風聊復散衣襟。憶君載酒相追處。紅萼青跗定滿林。

寄友人三首

萬里書歸說我愁。知君不忘北城幽。一篇封禪才難學。三畝蓬蒿勢易求。欲與山僧論地券。願爲鄰舍事田疇。應須急作南征計。漠北風沙不可留。

二

水邊幽樹憶同攀。會約移居向此間。欲語林塘迷舊逕。却隨車馬入他山。飛花著地容難冶。鳴鳥窺人意轉閑。物色可歌春不返。相思空復慘朱顏。

三

一別三年至一方。此身漂蕩只殊鄉。看沙更覺蓬萊淺。數日空驚霹靂忙。渺渺水波低赤岸。濛濛雲氣淡扶桑。登臨舊興無多在。但有浮槎意未忘。

寄張襄州

襄陽州望古來雄。耆舊相傳有素風。四葉表閭唐尹氏。一門逃世漢龐公。故家遺俗應多在。美景良辰定

不空遙憶習池寒。夜月幾人談笑伴詩翁。

次韻昌叔懷瀟樓讀書之樂

志食長年不得休。一巢無地拙於鳩。聊爲薄宦容身者。能免高人笑我不。道德文章吾事落。塵埃波浪此生浮。看君別後行藏意。回顧瀟樓祗自羞。

酬淨因長老樓上翫月見懷有疑君魂夢在清都之句

道人心與世無求。隱几蕭然在此樓。坐對高梧傾曉月。看翻清露洗新秋。登臨更欲邀元亮。披寫還能擬惠休。顧我不知天上樂。虛疑昨夜夢仙遊。

寄張諤招張安國金陵法曹

我老願爲臧丈人。君今少壯豈長貧。好須自致青冥上。可且相從寂寞濱。深谷黃鸝驕引子。曲碕翠碧巧藏身。尋幽觸靜還成興。何必區區九陌塵。

欲往淨因寄涇州韓持國

紫荆山下物華新。只與都城共一春。令節想君攜綠酒。故情憐我踏黃塵。泔魚已悔他年事。搏虎方收末路身。欲寄微言書不盡。試尋僧閣望西人。

送別韓虞部

客舍街南初著巾。與君兄弟卽相親。當年豈意兩家子。今日更爲同社人。京洛風塵嗟阻闕。江湖杯酒惜逡巡。歸帆嶺北茫茫水。把手何時寂寞濱。

懷舒州山水呈昌叔

山下飛鳴黃栗留。溪邊飲啄白符鳩。不知此地從君處。亦有他人繼我不。塵土生涯休盪滌。風波時事只飄浮。相看髮禿無歸計。一夢東南卽自羞。

呈柳子玉同年

三年不上鄴王臺。鴻鴈歸時又北來。水底舊波吹歲換。柳梢新葉卷春回。塵沙漠漠凋雙鬢。簫鼓忽忽把一盃。勞事欲歌無與和。衰顏思見故人開。

次韻陸定遠以謫往來求詩

牢落何由共一樽。相望空復歎芝焚。濟時尙負生平學。慰我應多別後文。可但風流追甫白。由來家世出機雲。行吟強欲偷新格。自笑安能到萬分。

李璋下第

浩蕩宮門白日開。君王高拱試羣材。學如吾子何憂失。命屬天公不可猜。意氣未宜輕感慨。文章尤忌數悲哀。男兒獨患無名爾。將相誰云有種哉。

送楊驥秀才歸鄱陽

客舍風塵弊綵衣。悲吟重見鴈南飛。荆山和氏方三獻。太學何生且一歸。曠野已寒諳獨宿。長年多難惜分違。巾箱所得皆幽懿。亦見鄉人爲發揮。

平山堂

城北橫岡走翠虬。一堂高視兩三州。淮岑日對朱欄出。江岫雲齊碧瓦浮。墟落耕桑公愷悌。杯觴談笑客風流。不知峴首登臨處。壯觀當時有此不。

示德逢

先生貧敝古人風。朽想柴桑在眼中。憐慙雞豚非孟子。勤勞禾黍信周公。深藏組纜三千牘。靜占寬閑五百弓。處世但令心自可。相知何藉一劉龔。

示四妹

孟光求壻得梁鴻。廡下相隨不諱窮。卓犖才名今日事。蕭條門巷古人風。五噫尙與時多忤。一笑兼忘我屢空。六月塵沙不相貸。泫然搔首又西東。

寄酬曹伯玉因以招之

寒鴉對立西風樹。幽草環生白露庭。清坐苦無公事擾。高談時有故人經。思君異日投朱紱。過我何時載淥醪。及此江湖氣蕭爽。最宜相值倒吾甌。

次韻奉酬李質夫

逸少池邊有舊山。幾年征淚染衣斑。鶩駘自飽方爭路。驥馱長飢不在閑。雪漲江南歸浩蕩。煙埋河朔去間關。勞歌一聽皆愁思。況我心非木石頑。

寄袁州曹伯玉使君

宜春城郭繞樓臺。想見登臨把一盃。濕濕嶺雲生竹菌。冥冥江雨熟楊梅。政成定入邦人詠。詩就還隨驛

使來錯莫風沙愁病眼。不知何日爲君開。

邢太保有鶴折翼以詩傷之客有記翎經冥三韻而忘其詩者因作四韻

不爲摧傷改性靈。靜中猶見好儀形。每憐今日長垂翅。却悔當時誤剪翎。醫得舊創猶有法。相知多難豈無經。稻梁且向人間覓。莫羨搏風起北冥。

寄致政吳虞部

白鷗生意在滄波。不爲風塵有網羅。年抵馮唐初未半。才方疎廣豈能多。孤清楚國知誰繼。遺愛郴人想共歌。嗟我欲歸真未晚。雪舟乘興會相過。

再至京口寄漕使曹郎中

漂流曾落此江邊。憶與詩翁賦浩然。浩然堂名鄉國去。身猶萬里驛亭分。首已三年北城紅。出高枝靚南浦。青回老樹圓。還似昔時風露好。只疑談笑在君前。

次韻平甫金山會宿寄親友

天末海門橫北固。煙中沙岸似西興。已無船舫猶聞笛。遠有樓臺祗見燈。山月入松金破碎。江風吹水雪崩騰。飄然欲作乘桴計。一到扶桑恨未能。

送何聖從龍圖

射策曾稱蜀郡雄。朝廷重得漢司空。應留賜席丹塗地。誤責飛芻紫塞功。三徑欲歸無舊業。百城先至有清風。潞山直與天爲黨。回首孫高想見公。

送趙學士陝西提刑

遙知彼俗經兵後。應望名公走馬來。陛下東求今日始。胸中包畜此時開。山西豪傑歸囊牘。渭北風光入酒盃。堪笑陋儒昏鄙甚。略無謀術贊行臺。

丙申八月作

秋風摧剝利如刀。漠漠昏煙玩日高。眼看南山露崖嶷。心隨東水轉波濤。歸期正自憑蒼蔡。生理應須問酒醪。還有詩書能慰我。不多霜雪上顛毛。

登西樓

樓影侵雲百尺斜。行人樓上憶天涯。情多自悔登臨數。目極因驚悵望賒。一曲平蕪連古樹。半分殘日帶明霞。潘郎何用悲秋色。祇此傷春髮已華。

卽事

河流南苑岸西斜。風有晶光露有華。門柳故人陶令宅。井桐前日摠持家。嘉招欲覆盃中滌。麗唱仍添錦上花。便作武陵樽俎客。川源應未少紅霞。

卷二十三

律詩 七言八句

酬吳仲庶小園之句



舊年臺榭掃流塵。職閉朱門歲又新。花影隙中看裊裊。車音牆外去嶙嶙。相逢豈少佳公子。一醉何妨薄主人。祇向東風邀載酒。定知無奈帝城春。

始與韓玉汝相近居。遂相與遊。今居復相近。而兩家子唱和詩相屬。因有此作。

羈旅兒童得近鄰。相知邂逅卽情親。當時豈意兩家子。此地更爲同社人。勳業彈冠知白首。文章投筆讓青春。萬金雖愧君多產。比我淵明亦未貧。

春寒

春風滿地月如霜。拂曉鍾聲到景陽。花底袂衣朝宿衛。柳邊新火起嚴粧。冰殘玉甃泉初動。水澀銅壺漏更長。從此暄妍知幾日。便應鷓鴣損年芳。

次韻再遊城西李園

京師花木類多奇。常恨春歸人未歸。車馬喧喧走塵土。園林處處鑷芳菲。殘紅已落香猶在。羈客多傷涕自揮。我亦悠悠無事者。約君聯騎訪郊圻。

予求守江陰未得。酬昌叔憶江陰見及之作。

黃田港北水如天。萬里風檣看賈船。海外珠犀常入市。人間魚蟹不論錢。高亭笑語如昨日。末路塵沙非少年。強乞一官終未得。祇君同病肯相憐。

送蘇屯田廣西轉運

置將從來欲善師。百城蹉跎起毫釐。驅除久費兵符出。按撫紛煩使節移。恩澤易行窮苦後。功名常見急

難時。孺文此日風流在。直筆他年豈愧辭。

酬淮南提刑邵不疑學士來詩及予送沈常州之詩而卒。有素壁鑱詩尙未泥之句。

曾詠常州送主人。豈知身得兩朱輪。田疇汎濫川方壅。廚傳蕭條市亦貧。以我薄材思拊卹。賴君餘教得因循。詢求故有風謠在。不獨鑱詩尙未泯。

酬王太祝

一馬常隨世事馳。豈論江徼與河湄。已成白髮潘常侍。更似青衫杜拾遺。勳業儻來知有命。文章聊欲見無期。喜君材俊能從我。力學何妨和子思。

出城訪無黨因宿齋館

關外尋君信馬蹄。漫成詩句任天倪。花枝到眼春相照。一作映山色侵衣晚自迷。今日笑談還喜共。經年勞逸固難齊。生涯零落歸心懶。多謝慇懃杜宇啼。

寄張氏女弟

十年江海別常輕。一作經豈料今隨寡嫂行。心折向誰論宿昔。魂來空復夢平生。音容想像猶如昨。歲月蕭條忽已更。知汝此悲還似我。欲爲西望涕先橫。

奉寄子思以代別

南北蹉跎成兩翁。悲歡邂逅笑言同。全家欲出嶺雲外。匹馬肯尋山雨中。趨府折腰嗟踽踽。聽泉分手惜怱怱。寄聲但有加飡飯。才業如君豈久窮。

次韻劉著作過茆山今平甫往遊因寄

華陽仙伯有茆卿。官府今傳在赤城。三鶴不歸猶地勝。二君能到亦心清。詩中慷慨悲陳迹。篇末慙勸獎後生。遙想青雲知可附。坐看閭巷得名聲。

次韻十四叔賜詩留別

窮冬追路出西津。得待茫然兩見春。發册久嗟淹國士。起家初命慰鄉人。行辭北闕樓臺麗。歸佐南州縣邑新。班草數行衣上淚。何時杖屨却相親。

次韻耿天隲大風

雲埋月缺暈寒灰。颺發齊如巨象厓。縱勇萬川冰柱立。紛披千障土囊開。魯門未怪爰居至。鄭圃何妨禦寇來。終夜不眠誰與共。坐忘唯一顏回。

法喜寺

門前白道自縈回。門下青莎間綠苔。雜樹繞花鶯引去。壞簷無幕鷺歸來。寂寥誰共樽前酒。牢落空留案上杯。我憶故鄉誠不淺。可憐鷓鴣重相催。

長干寺

梵館清閑側布金。小塘回曲翠文深。柳條不動千絲直。荷葉相依萬蓋陰。漠漠岑雲相上下。翩翩沙鳥自浮沉。羈人樂此忘歸思。忍向西風學越吟。

落星寺在南康軍江中

峯雲臺殿起崔嵬。萬里長江一酒杯。坐見山川吞日月。杳無車馬送塵埃。鴈飛雲路聲低過。客近天門夢易迴。勝概唯詩可收拾。不才羞作等閑來。

清風閣

飛臺孤起下州牆。勝勢崢嶸壓四方。遠引江山來控帶。平看鷹隼去飛翔。高蟬感耳何妨靜。赤日焦心不廢涼。況是使君無一事。日陪賓從此傾觴。

留題微之廨中清輝閣

故人名字在瀛洲。邂逅低徊向此留。鷗鳥一雙隨坐笑。荷花十丈對冥搜。水涵樽俎清如洗。山染衣巾翠欲流。宣室應疑鬼神事。知君能復幾來遊。

次韻和甫春日金陵登臺

鍾山漠漠水洄洄。西有陵雲百尺臺。萬物已隨和氣動。一樽聊與故人來。天邊幽鳥鳴相和。地上晴煙掃不開。悲眼看春長一作唯恐盡。直須去取六龍回。

慶老堂 陳繹

板輿去國宦三年。華屋歸來地一偏。神竹常疑出冬筍。開池故合涌寒泉。身閑楚老猶能戲。道勝鄒人不更遷。嗟我強顏無所及。想君爲樂更焦然。

寄陳宣叔

扁舟欲動更徘徊。一笑相看病眼開。事忤貴人今見節。政行豪縣衆稱材。忽驚歲月侵雙鬢。却喜山川共

一杯落日亂流江北去。離心猶與水東迴。

寄張劍州并示女弟時張以太夫人喪自劍州歸。

劍閣天梯萬里寒。春風此日白衣冠。烏辭反哺顛毛黑。鳥引思歸口血丹。行路想君今皆瘦。相逢添我老  
悲酸。浮雲渺渺吹西去。每到原頭勒馬看。

元珍以詩送綠石硯所謂玉堂新樣者

玉堂新樣世爭傳。況以蠻溪綠石鐫。嗟我長來無異物。愧君持贈有佳篇。久埋瘴霧看猶濕。一取春波洗  
更鮮。還與故人袍色似。論心於此亦同堅。

和微之林亭

爲有檀欒占雒陽。憶歸杖策此徜徉。觀魚得意還知樂。入鳥忘機肯亂行。未敢許君輕去國。不應如我漫  
爲郎。中園日涉非無趣。保此千鍾慰北堂。

酬微之梅暑新句

江梅落盡雨昏昏。去馬來牛漫不分。當此沈陰無白日。豈知炎旱有彤雲。琴絃欲緩何妨促。畫蠹微生故  
可熏。回首涼秋知未遠。會須重曝阮郎裋。

平甫與寶覺遊金山思大覺并見寄及相見得詩次韻二首

寵參時宰道人琳。氣蓋諸公弟季心。勝踐肯論山在險。冥搜欲與海爭深。搖搖北下隨帆影。踽踽東來想  
足音。握手更知禪伯遠。隔雲靈鷲碧千尋。

二

漳南開士好叢林，慧劍何年出水心。獨往便應諸漏盡，相逢未免故情深。檻窺山鳥有真意，窗聽海潮非世音。一笑上方人事外，不知衰境兩侵尋。

金陵懷古四首

霸祖孤身取二江，子孫多以百城降。豪華盡出成功後，逸樂安知與禍雙。東府舊基留佛刹，後庭餘唱落船窗。黍離麥秀從來事，且置興亡近酒缸。

二

天兵南下此橋江，敵國當時指顧降。山水雄豪空復在，君王神武自難雙。留連落日頻回首，想像餘墟獨倚窗。却怪夏陽纔一葦，漢家何事費罍缸。

三

地勢東回萬里江，雲間天闕古來雙。兵纏四海英雄得，聖出中原次第降。山水寂寥埋王氣，風烟蕭颯滿僧窗。廢陵壞冢空冠劍，誰復沾纓酌一缸。

四

憶昨天兵下蜀江，將軍談笑士爭降。黃旗已盡年三百，紫氣空收劍一雙。破堞自生新草木，廢宮誰識舊軒窗。不須搔首尋遺事，且倒花前白玉缸。

次韻舍弟遇子固憶少述時舍弟在臨川

歸計何時就一塵。寒城回首意茫然。野林細錯黃金日。溪岸寬圍碧玉天。飛兔已聞追騷鬩。太阿猶恨失龍泉。遙知更憶河濱友。從事能忘我獨賢。

次韻昌叔詠塵

塵土輕颺不自持。紛紛生物更相吹。翻成地上高烟霧。散在人間要路岐。一世競馳甘眯目。幾家清坐得軒眉。超然祗有江湖上。還見波濤恐我時。

石竹花

退公詩酒樂華年。欲取幽芳近綺筵。種玉亂抽青節瘦。刻繒輕染絳花圓。風霜不放飄零早。雨露應從愛惜偏。已向美人衣上繡。更留佳客賦嬋娟。

古松

森森直幹百餘尋。高入青冥不附林。萬壑風生成夜響。千山月照掛秋陰。豈因糞壤栽培力。自得乾坤造化心。廊廟乏材應見取。世無良匠勿相侵。

玉晨大檜鶴廟古松最爲佳樹

壇廟千年草不生。幽真曾此蔭餘清。月枝地上流雲影。風葉天邊過雨聲。材大賢於人有用。節高仙與世無情。秦山陂下今迷處。苦里宮中漫得名。

次韻董伯懿松聲

天機自動豈關情。能作人間物外聲。暝聒一堂無客夢。曉悲千嶂有猿驚。廟中奏瑟沈三嘆。堂下吹簫失

九成。俚耳紛紛多鄭衛。直須聞此始心清。

次韻答平甫

高蟬抱殼悲聲切。新鳥爭巢諄語忙。長樹老陰欺夏日。晚花幽艷敵春陽。雲歸山去當簷靜。風過溪來滿坐涼。物物此時皆可賦。悔予千里不相將。

次韻質夫兄使君同年

樓堞相望一日程。春風吹急似搖旌。莫言樂國無愁夢。賴把新詩有故情。客舍五漿非所願。私田三徑會須成。青雲自致歸公等。如我何緣得此聲。

卷二十四

律詩 七言八句

金明池

宜秋西望碧參差。憶看鄉人禊飲時。斜倚水開花有思。緩隨風轉柳如癡。青天白日春常好。綠髮朱顏老自悲。跋馬未堪塵滿眼。夕陽偷理釣魚絲。

葛溪驛

缺月昏昏漏未央。一燈明滅照秋牀。病身最覺風露早。歸夢不知山水長。坐感歲時歌慷慨。起看天地色淒涼。鳴蟬更亂行人耳。正抱疎桐葉半黃。



泛舟青溪入水門。登高齋奉呈康叔。

簿領紛紛惜此時。起攜佳客散沈迷。十園但見諸營柳。九曲難尋故國溪。牽隸欲隨流水遠。放船終礙畫橋低。子猷清興何曾盡。想憶高齋更一躋。

爲裴使君賦擬峴臺

君作新臺擬峴山。羊公千載得追攀。歌鍾殷地登臨處。花木移春指顧間。城似大隄來宛宛。溪如清漢落潺潺。時平不比征吳日。緩帶尤宜向此閑。

送李才元校理知卬州

朝廷孝治稱今日。鄉郡榮歸及壯時。關吏相呼迎印綬。里兒爭出望旌麾。北堂已足誇三釜。南畝當今識兩歧。獨我尙留真有命。天於人欲本無私。

送張頡仲舉知奉新

故人爲邑士多稱。繇賦寬除獄訟平。老吏閉門無重糈。荒山開隴有新粳。方揮玉麈日邊坐。又結銅章天外行。此去料君歸不久。挾材如此卽名卿。

張劍州至劍一日以新憂罷

客舍飛塵尙滿鞵。却尋東路想茫然。白頭反哺秦烏側。流血思歸蜀鳥前。今日相逢知悵望。幾時能到與留連。行看萬里雲西去。倚馬春風不忍鞭。

次韻子履遠寄之作

飄然逐客出都門。士論應悲玉石焚。高位紛紛誰得志。窮途往往始能文。柴桑今日思元亮。天祿何時召子雲。直使聲名傳後世。窮通何必較功勳。

送李太保知饒州

北平上谷當時守。氣略人推李廣優。還見子孫持漢節。欲臨關塞撫羌酋。雲邊鼓吹應先喜。日下旌旗更少留。五字亦君家世事。一吟何以稱來求。

送西京簽判王著作

兒曹會上洛城頭。尚記清波遶驛流。却想山川常在夢。可憐顏髮已驚秋。辟書今日看君去。著籍長年歎我留。三十六峯應好在。寄聲多謝欲來遊。

送劉貢父赴秦州清水

劉郎高論坐噓枯。幕府調矚用緒餘。筆下能當萬人敵。腹中嘗記五車書。聞多望士登天祿。知有名臣薦子虛。且復弦歌窮塞上。祗應非晚召相如。

送純甫如江南

青溪看汝始踟躕。兄弟追隨各少年。壯爾有行今納婦。老吾無用亦求田。初來淮北心常折。却望江南眼更穿。此去還知苦相憶。歸時快馬亦須鞭。

送郊社朱兄除郎東歸

手持官牒出神臯。迎客遙知賀酒醪。照映里門非白屋。欺凌春草有青袍。宦遊雖晚何妨久。餓顯從來不

必高孝友。父兄家法在。想能清白遺兒曹。

送沈康知常州

作客蘭陵迹已陳。爲傳謠俗記州民。溝塍半廢田疇薄。廚傳相仍市井貧。常恐勞人輕白屋。忽逢佳士得朱輪。慇懃話此還惆悵。最憶荆溪兩岸春。

安豐張令修芍陂

桐鄉振廩得周旋。芍水修陂道路傳。目想僇功追往事。心知爲政似當年。魴魚鱗歸城市。秔稻紛紛載酒船。楚相祠堂仍好在。勝遊思爲子留篇。

送復之屯田赴成都

槃礴西南江與岷。石犀金馬世稱神。桑麻接畛餘無地。錦繡連城別有春。結綬相隨通籍久。推車此去辟書新。知君不爲山川險。便忘吾家叱馭人。

送經臣富順寺丞

故人爲縣楚江邊。海角猶聞政事傳。萬井已安如赤子。一麾今去上青天。應開醉眼醪醑下。莫起歸心杜宇前。報主代親俱有地。幾人忠孝似君全。

送張卿致仕

子房籌策漢時功。身退超然慕赤松。餘烈尙能開後世。高材今復繼前蹤。執鞭始負平生願。操几何知此地逢。竊食一官慚未艾。緒言方賴賜從容。

送梅龍圖

子真家世子雲鄉。風力才華豈易當。回首古人多隱約。致身今日獨輝光。謨明久合分三府。治劇聊須試一方。從此政成何所報。百城無事祗耕桑。

送李秘校南歸

四十青衫更旅人。悠悠飢馬傍沙塵。久留上國言空富。却走南州食轉貧。自作詩書能見志。應知時命不關身。江湖勝事從今數。肯但悲歌寂寞濱。

送蕭山錢著作

才高諸彥故無嫌。兄弟同時舉孝廉。東觀外除方墨綬。西州相見已蒼髯。靈胥引水清穿市。神禹分山翠入簾。好去弦歌聊自慰。郡人誰敢慢陶潛。

送靈山裴太博

一官留隱太常中。生事蕭然信所窮。有力尙期當世用。無求今見古人風。遭迴舊學皆殘藁。邂逅相看各老翁。他日卜居何處好。溪山還欲與君同。

送趙燮之蜀永康簿

蜀山萬里一青袍。石棧天梯筆巒高。多學侶君寧易得。小官於此亦徒勞。行追西路聊班草。坐憶南州欲夢刀。他日寄聲能問我。應從錦水至江臯。

酬吳季野見寄時被召來詩以賈誼見方。

漫披陳蠹學經綸。捧檄生平祗爲親。聞道不先從事早。課功無狀取官頻。豈堪置足青冥上。終欲回身寂寞濱。俯仰謬恩方自歎。慚君將比洛陽人。

和平甫寄陳正叔

強行南仕莫辭勤。聞說田園已曠耘。縱使一區猶有宅。可能三月尙無君。且同元亮傾罇酒。更與靈均續舊文。此道廢興吾命在。世間滕口任云云。

送王太卿致政歸江陵

九卿初命亞三司。朝吏相瞻得老師。南闕便還新印綬。東舟只載舊書詩。漢庭餞客無佳句。越水歸裝有富貲。回首千年見疎范。共疑今事勝當時。

送叔康侍御

詔取名郎入憲臺。此時方急濟時才。聖聰應已虛心待。姦黨寧無側目猜。白筆豈知權可畏。阜囊還請上親開。佇聞讜論能醫國。飛報頻隨驛騎來。

寄朱昌叔

清江浸浸透城流。尙憶城邊繫小舟。射虎未能隨李廣。割雞空欲戲言游。雲埋塞路驚塵合。霜入春風滿鬢愁。此日君書苦難得。漫多鴻鴈近南洲。

九日登東山寄昌叔

城上啼烏破寂寥。思君何處坐岵嶠。應須綠酒醺黃菊。何必紅裙弄紫簫。落木雲連秋水渡。亂山煙入夕

陽橋淵明久負東籬醉。猶分低心事折腰。

到舒次韻答平甫

夜別江船曉解驂。秋城氣象亦潭潭。山從樹外青爭出。水向沙邊綠半涵。行問嗇夫多不記。坐論公瑾少能談。只愁地僻無賓客。舊學從誰得指南。

舒州七月十一日雨

行看野氣來方勇。臥聽秋聲落竟慳。浙瀝未生羅豆水。蒼忙空失皖公山。火耕又見無遺種。肉食何妨有厚顏。巫祝萬端曾不救。只疑天賜雨工閑。

次韻答丁端州

莫嗟荒僻又離羣。且喜風謠嶺北聞。銅柱雖然蠻徼接。竹符還是漢家分。春書來逐衡陽鴈。秋騎歸看隴首雲。相見會知南望苦。病骸今似沈休文。

答劉季孫

偶著儒冠敢陋今。自憐多負少時心。輕軒已任人前後。揭厲安知世淺深。挾筴有思悲慷慨。負薪無力病侵淫。愧君綠綺虛投贈。更覺貧家報乏金。

次韻酬王太祝

塵土波瀾不自期。飄然身與願相違。衰根要路知難植。病羽長年欲退飛。高論已嗟能聽少。力行還恨賦材微。慚君俊少今知我。一見心如客得歸。

寄吳成之

綠髮溪山笑語中。豈知翻手兩成翁。辛夷屋角搏香雪。躑躅岡頭挽醉紅。想見舊山茅徑在。近隨今日板輿空。渭陽車馬嗟何及。榮祿方當與子同。

寄曾子固

斗粟猶慚報禮輕。敢嗟吾道獨難行。脫身負米將求志。戮力乘田豈爲名。高論幾爲衰俗廢。壯懷難值故人傾。荒城回首山川隔。更覺秋風白髮生。

至開元僧舍上方次韻舍弟二月一日之作

溪谷濺濺嫩水通。野田高下綠蒙茸。和風滿樹笙簧雜。霽雪兼山粉黛重。萬里有家歸尚隔。一塵無地去何從。傷春故欲西南望。迴首荒城已暮鍾。

寄王回深甫

少年倏忽不再得。後日歡娛能幾何。願我面顏衰更早。憐君身世病還多。牕間暗淡月含霧。船底飄颻風送波。一寸古心俱未試。相思中夜起悲歌。

次韻答彥珍

手得封題手自開。一篇美玉綴玫瑰。衆知圓媚難論報。自顧窮愁敢角才。君臥南陽惟畎畝。我行西路亦風埃。相逢不必嗟勞事。尚欲賡歌詠起哉。

寄闕下諸父兄兼示平甫兄弟

父兄爲學衆人知。小弟文章亦自奇。家勢到今宜有後。士才如此豈無時。久聞陽羨溪山好。頗與淵明性分宜。但願一門皆貴仕。時將車馬過茆茨。

卷二十五

律詩 七言八句 七言長篇附

鍾山西庵白蓮亭

山亭新破一方苔。白帝留花滿四隈。野豔輕明非傅粉。秋光清淺不憑材。鄉窮自作幽人伴。歲晚誰爲靜女媒。可笑遠公池上客。卻因松菊賦歸來。

贈老寧僧首

秀骨龐眉倦往還。自然清譽落人間。閑中用意歸詩筆。靜外安身比太山。欲倩野雲朝送客。更邀江月夜臨關。嗟予蹤迹飄塵土。一對孤峯幾厚顏。

次韻舍弟賞心亭卽事二首

檻折簷傾野水傍。臺城佳氣已消亡。難披梗莽尋千古。獨倚青冥望八荒。坐覺塵沙昏遠眼。忽看風雨破驕陽。扁舟此日東南興。欲盡江流萬里長。

二

霸氣消磨不復存。舊朝臺殿祗空村。孤城倚薄青天近。細雨侵凌白日昏。稍覺野雲成晚霽。卻疑山月是



朝暾此時江海無窮興。醒客忘言醉客喧。

次韻陳學士小園卽事

牆屋雖無好鳥鳴。池塘亦未有蛙聲。樹含宿雨紅初入。草倚朝陽綠更生。萬物天機何得喪。百年心事不將迎。與君杖策聊觀化。搔首春風眼尚明。

寄友人

飄然羈旅尙無涯。一望西南百嘆嗟。江擁涕洟流入海。風吹魂夢去還家。平生積慘應銷骨。今日殊鄉又見花。安得此身如草樹。根株相守盡年華。

登大茅山

一峯高出衆山顛。疑隔塵沙道里千。俯視煙雲來不極。仰攀蘿葛去無前。人間已換嘉平帝。地下誰通句曲天。陳迹是非今草莽。紛紛流俗尙師仙。

登中茅山

翛然杖屨出塵囂。雞犬無聲到汶寥。欲見五芝莖葉老。尙攀三鶴羽翰遙。容溪路轉迷橫釣。仙几風來得墮樵。興罷日斜歸亦懶。更磨碑藓認前朝。

登小茅山

捫蘿路到半天窮。下視淮州杳靄中。物外真游來几席。人間榮願付蒼通。白雲坐處龍池杳。明月歸時鶴馭空。回首三君誰更似。子房家世有高風。

送張仲容赴杭州孫公辟

萬屋相誇漆與丹。笑歌長在綺紈間。綵船春戲城邊水。畫燭秋尋寺外山。憶我屢隨遊客入。喜君今赴辟書還。遙知曼倩威行久。赤筆應從到日閑。

贈李士寧道人

季主逡巡居卜肆。彌明邂逅作詩翁。曾令宋賈歎車上。更使劉侯驚坐中。杳杳人傳多異事。冥冥誰識此高風。行歌過我非無謂。唯恨貧家酒盞空。

次韻春日即事

人間尙有薄寒侵。和氣先薰草樹心。丹白自分齊破蕾。青黃相向欲交陰。潺潺嫩水生幽谷。漠漠輕煙動遠林。病得一官隨太守。班春無助愧周任。

次韻答陳正叔二首

青衫憔悴北歸來。髮有霜根面有埃。羣吠我方憎獬子。一鳴誰更識龍媒。功名落落求難值。日月云云去不回。勝事與身何等近。酒樽詩卷數須開。

二

田宅荒涼去復來。詩書顏髮兩塵埃。忘機自許鷗相狎。得禍誰期鶴見媒。此道未行身有待。古人不見首空回。何當水石他年住。更把韋編靜處開。

送崔左藏之廣東

怪石巉巖上沅寥。昔人於此奏簫韶。水清但有嘉魚出。風暖何曾毒草搖。今日淹留君按節。當時嬉戲我垂髫。因尋舊政詢遺老。爲作新詩變俚謠。

苦雨

靈場奔走尙無功。去馬來車道不通。風助亂雲陰更密。水爭高岸氣尤雄。平時溝洫今多廢。下戶京囷久已空。肉食自嗟何所報。古人憂國願年豐。

江上

村落家家有濁醪。青旗招客解祗裯。春風似補林塘破。野水遙連草樹高。寄食舟車隨處弊。行歌天地此身勞。遲回自負平生意。豈是明時惜一毛。

午枕

百年春夢去悠悠。不復吹簫向此留。野草自花還自落。鳴禽相乳亦相酬。舊蹊埋沒開新徑。朱戶欹斜見畫樓。欲把一盃無伴侶。眼看興廢使人愁。

寄石鼓寺陳伯庸

鯨海無風白日閑。天門當面險難攀。塵埃掉臂離長陌。琴酒和雲入舊山。仁義未饒軒冕貴。功名莫信鬼神慳。郭東一點英雄氣。時伴君心夜斗間。

送熊伯通

歲暮欣逢蓋共傾。川塗南北豈忘情。事經官路心應折。地入家山眼更明。江上月華空自照。梅邊春意恰

相迎。關河不鎖真消息。野客猶能聽治聲。

送王覃

分走人間十五年。塵沙吹鬢各蒼然。山林渺渺長回首。兒女紛紛忽滿前。知子有才思奮發。嗟余無地與迴旋。相看一作秦吳別。身世何時兩息肩。

送明州王大卿

大曆才臣有此州。昆雲今駕鹿轡游。從來所至邦人喜。真復能分聖主憂。千里封疆何足治。一時名跡故應留。屬城舊吏雖疲懶。尚可揮毫敵李舟。

姑胥郭

誤褫雲巾別故山。抵吳由越兩間關。千家漁火秋風市。一葉歸舟暮雨灣。旅病恹恹如困酒。鄉愁脈脈似連環。情知帶眼從前緩。更恐顛毛自此斑。

嚴陵祠堂

漢庭來見一羊裘。默默俄歸舊釣舟。迹似磻溪應有待。世無西伯可能留。崎嶇馮衍才終廢。索寞桓譚道不謀。勺水果非鱸鮓地。放身滄海亦何求。

藏春塢詩獻刁十四丈學士

蒜山東渡得林丘。邂逅籃輿亦少留。今日更知萊氏隱。暮年長憶武陵遊。欲營垣屋隨穿斲。尙歎塵沙隔獻酬。遙約向吳亭下路。春風深駐五湖舟。

太湖恬亭

檻臨溪上綠陰圍。溪岸高低入翠微。日落斷橋人獨立。水涵幽樹鳥相依。清遊始覺心無累。靜處誰知世有機。更待夜深同徙倚。秋風斜月釣船歸。

蒙城清燕堂

清燕新碑得自蒙。行吟如到此堂中。吏無田甲當時氣。民有莊周後世風。庭下早知閑木索。坐間遙想御絲桐。飄然一往何時得。俛仰塵沙欲作翁。

次韻酬吳彥珍見寄二首時彥珍爲教授。學有右軍墨池。

君作新詩故起予。一吟聊復報雙魚。杖藜高徑誰來往。散帙空堂自卷舒。樹外鳥啼催晚種。花間人語趁朝虛。春風處處堪攜手。何事臨池苦學書。

二

篁竹荒茅五畝餘。生涯山蕨與泉魚。家貧殖貨羞端木。鄉里傳書比仲舒。白日憶君聊遠望。青林嗟我似逃虛。春風渺渺烏塘尾。漫得東來一紙書。

自金陵如丹陽道中有感

數百年來王氣消。難將前事問漁樵。苑方秦地皆蕪沒。山借揚州更寂寥。荒埭暗雞催月曉。空場老雉挾春驕。豪華祗有諸陵在。往往黃金出市朝。

初去臨川

東浮溪水渡長林。上坂回頭一拊心。已覺省煩非仲叔。安能養志似曾參。憂傷遇事紛紛出。疾病乘虛疊疊侵。未敢養志似曾參。憂傷遇事紛紛出。疾病乘虛疊疊侵。未敢養志似曾參。憂傷遇事紛紛出。疾病乘虛疊疊侵。手把空篇臥空屋。欲歌商頌不成音。

讀史

自古功名亦苦辛。行藏終欲付何人。當時黜闇猶承誤。末俗紛紜更亂真。糟粕所傳非粹美。丹青難寫是精神。區區豈盡高賢意。獨守千秋紙上塵。

讀詔書慶歷七年

去秋東出汴河梁。已見中州旱勢強。日射地穿千里赤。風吹沙度滿城黃。近聞急詔收羣策。頗說新年又亢陽。賤術縱工難自獻。心憂天下獨君王。

每見王太丞。邑事甚冗而剗劇之暇。能過訪山館。兼出佳篇爲贈。仰嘆才力因成小詩。

我看繁訟頻搔首。君富才明見亦常。尙有閑襟尋水石。更留佳句似池塘。松苗地合分高下。鳧鶴天教有短長。徐上青雲猶未晚。可無音問及滄浪。

王浮梁太丞之聽訟軒有水禽三巢於竹林之上。恬而自得。邑人作詩以美之。因次元韻。

水邊舟動多驚散。何事林間近絕疑。野意肯從威令至。舊巢猶有主人知。見王太丞詩不關飲啄春江暖。自在飛鳴夏日遲。覽德豈無丹穴鳳。到時應讓向南枝。

寄虞氏兄弟

一身兼抱百憂虞。忽忽如狂久廢書。疇昔心期俱喪勇。此來腰疾更乘虛。久聞楊羨安家好。自度淵明與世疎。亦有未歸溝壑日。會應相近置田廬。

### 除夜寄舍弟

一尊聊有天涯憶。百感翻然醉裏眠。酒醒燈前猶是客。夢回江北已經年。佳時流落真何得。勝事蹉跎只可憐。唯有到家寒食在。春風因泛瀕溪船。

### 答熊本推官金陵寄酒

鬱金香是蘭陵酒。枉入詩人賦詠來。庭下北風吹急雪。坐間南客送寒醅。淵明未得歸三徑。金陵有舊廬。叔夜猶同把一盃。吟罷想君醒醉處。鍾山相向自崔嵬。

### 和錢學士喜雪

手把詩翁憶雪詩。坐愁窮海瘴煙霏。誰令天上蒼茫合。忽見空中散漫飛。闔闔與風生氣勢。姮娥交月借光輝。山鷄瑟縮相依立。邑犬跳梁未肯歸。點綴丘園榮樹木。埋藏溝壑亂封圻。高歌業已傳都市。逸興何當叩隱扉。頗欲攜樽邀使騎。幾忘溫席薦親闈。公今早晚班春去。強勸澆田補歲饑。

### 送江寧彭給事赴闕

西江望士衆長兼。卓犖傳家在一男。壯志異時開史牒。妙齡終日對書龕。桂堂發策收科選。櫻苑頒詩豫宴酣。大邑援琴聊試可。小州懷絨果才堪。分臺拜職榮先入。抗疏辭恩恥橫覃。勁操比松寒不撓。忠言如藥苦非甘。龍鱗直爲常官觸。虎穴寧關射利探。朱轂獸頭終協夢。粉闈雞舌更須含。均輸北轉荆門鷁。勸

課西臨蜀市蠶。期信有兒迎郭伋。食貧無地乞羊曇。囊垂鈴棧駝鳴圓。節擁棠郊虎視耽。歸見廣墀瞻斧藻。對揚初服改朱藍。進班華省財方阜。出按窮邊虜稍戡。帝命賈琮當冀北。民歌姬爽次周南。投壺饗客魚無乙。伐鼓蒐兵馬有驪。鯨鱉掀紅旗杳杳。虬髯吒黑纛鬚鬚。威加諸部風霜肅。惠浸連營雨露涵。大斗時時能劇飲。輕裘往往祗清談。乾龍已應天飛五。晉馬徐觀晝接三。道在君臣方自合。德侔卿長亦誰慚。便蕃肯較平生寵。放曠皆知雅性尃。委佩去辭廷殖殖。揚舲來得府潭潭。一尊客語從容盡。千里人情委曲諳。豈但搢紳稱召杜。故多扶杖祝彭聃。幕中俊乂閑刀筆。帳下驍雄冷劍鐔。楚地怪須留汲黯。蕭規疑欲付曹參。從來貴勢公何慕。自是賢名上所貪。未信逸身今以老。且當憂國每如惓。論心邂逅膠投漆。搔首低徊雪滿簷。鎮撫未驚移歲月。追攀曾許賞煙嵐。餘歡遽隔新亭餞。宿惠難忘舊館驂。卷曲尙誰知散櫟。崢嶸空此詠枯楠。

卷二十六

律詩 五言絕句 回紋 六言詩附

聊行

聊行弄芳草。獨坐隱團蒲。問客茅簷日。君家有此無。

染雲

染雲爲柳葉。剪水作梨花。不是春風巧。何緣有歲華。



溝港

溝港重重柳。山坡處處梅。小輿穿麥過。狹徑礙桑回。

霹靂溝

霹靂溝西路。柴荆四五家。憶曾騎款段。隨意入桃花。

午睡

簷日陰陰轉。牀風細細吹。翛然殘午夢。何許一黃鸝。

題齊安壁

日淨山如染。風暄草欲薰。梅殘數點雪。麥漲一溪雲。

昭文齋米黻題余定林所居因作。

我自中山客。何緣有此名。當緣琴不鼓。人不見虧成。

臺上示吳愿

細書妨老讀。長簟愜昏眠。取簞且一息。拋書還少年。

示道原

久不在城市。少留心悵然。幽芳可攬結。佇子飲雲泉。

傳神自讚

此物非他物。今吾卽故吾。今吾如可狀。此物若爲摹。

題何氏宅園亭

荷葉參差卷。榴花次第開。但令心有賞。歲月任渠催。

草堂一上人

一公持一鉢。想復度遙岑。地瘦無黃犢。春來草更深。

題黃司理園

爲憶去年梅。凌寒特地來。閨前空臘盡。渾未有花開。

北山游亭

西崦水泠泠。淞岡有游亭。自從春草長。遙見秣青青。

題永昭陵

神闕澹朝暉。蒼蒼露未晞。龍車不可望。投老涕霑衣。

詠穀

可憐臺上穀。轉目已陰繁。不解詩人意。何爲樂彼園。

池上看金沙花數枝過醑醺架盛開

故作醑醺架。金沙祗護栽。似矜顏色好。飛度雪前開。

五柳

五柳柴桑宅。三楊白下亭。往來無一事。長得見青青。

移松皆死

李白今何在。桃紅已索然。君看赤松子。猶自不長年。

山中

隨月出山去。尋雲相伴歸。春晨花上露。芳氣著人衣。

送王補之行風忽作因題四句於舟中

淮口西風急。君行定幾時。故應今夜月。未便照相思。

被召作

榮祿嗟何及。明恩愧未酬。欲尋西掖路。更上北山頭。

再題南澗樓

北山雲漠漠。南澗水悠悠。去此非吾願。臨分更上樓。

南浦

南浦隨花去。迴舟路已迷。暗香無覓處。日落畫橋西。

題定林壁懷李叔時

雲與淵明出。風隨禦寇還。燎爐無伏火。蕙帳冷空山。

離蔣山

出谷頻回首。逢人更斷腸。桐鄉豈愛我。我自愛桐鄉。

江上

江水漾西風。江花脫晚紅。離情被橫笛。吹過亂山東。

春雨

苦霧藏春色。愁霖病物華。幽奇無可奈。強釀一杯霞。

歸燕

馬上逢歸燕。知從何處來。貪尋舊巢去。不帶錦書迴。

和惠思波上鷗

翩翩白鳧鷗。汎汎水中游。西來久不見。夢想在滄洲。

秣陵道中口占二首

經世才難就。田園路欲迷。慙慙將白髮。下馬照青溪。

二

歲熟田家樂。秋風客自悲。茫茫曲城路。歸馬日斜時。

次青陽

十載九華邊。歸期尙眇然。秋風一乘傳。更覺負林泉。

代陳景元書于太一宮道院壁

官身有吏責。觸事遇嫌猜。野性豈堪此。廬山歸去來。

山雞

山雞照淥水。自愛一何愚。文采爲世用。適足累形軀。

雜詠四首

故畦拋汝水。新壘寄鍾山。爲問揚州月。何時照我還。

二

已作湖陰客。如何更遠遊。章江昨夜月。送我到揚州。

三

證聖南朝寺。三年到百回。不知牆下路。今日幾荷開。

四

桃李石城塢。餉田三月時。柴荆常自閉。花發少人知。

臥聞

臥聞黃栗留。起見白符鳩。坐引魚兒戲。行將鹿女遊。

秋興有感

宿雨清畿甸。朝陽麗帝城。豐年人樂業。隴上踏歌聲。

題八功德水

欲尋阿練若。曳屐出東岡。澗谷芳菲少。春風著野桑。

口占

去歲別南嶽。前年返泐潭。臨機一句子。今日遇同參。

偶書

雄也營身足。聃兮悟汝多。捐書知聖已。絕學奈禽何。

送陳景初金陵持服舉族貧病煩君藥石之功

舉族貧兼病。煩君藥石功。長安何日到。一一問歸鴻。

泊姚江

札札櫓聲急。蒼蒼江日低。吾行有定止。潮汐自東西。

樓上

蕩漾舟中客。徘徊樓上人。滄波浩無主。兩槳邈難親。

春晴

新春十日雨。雨晴門始開。靜看蒼苔紋。莫上人衣來。

淨相寺

淨相前朝寺。荒涼二十秋。曾遭滅劫壞。今遇勝緣修。

將母

將母邗溝上。留家白紵陰。月明聞杜宇。南北搃關心。

朱朝議移法雲蘭

幽蘭有佳氣。千載闔山阿。不出阿蘭若。豈遭乾闥婆。

晚歸

岸迥重重柳。川低渺渺河。不愁南浦暗。歸伴有姮娥。

題舫子

愛此江邊好。留連至日斜。眠分黃犢草。坐占白鷗沙。

惠崇畫

斷取滄州趣。移來六月天。道人三昧力。變化只和鋤。

蒲葉

蒲葉清淺水。杏花和暖風。地偏緣底綠。人老爲誰紅。

芳

芳草知誰種。綠塔已數叢。無心與時競。何苦綠忽忽。

與徐仲元自讀書臺上定林

橫絕滌浚度。深尋犖确行。百年同逆旅。一壑我平生。

病中睡起折杏花數枝二首

獨臥南牕榻。翛然五六旬。已聞鄰杏好。故挽一枝春。

二

獨臥無心起，春風閉寂寥。  
鳥聲誰喚汝，屋角故相撩。

送望之赴臨江

黃雀有頭顱，長行萬里餘。  
想因君出守，暫得免苞苴。

送丁廓秀才歸汝陰

風駛柳條乾，駝裘未勝寒。  
慙慙陌上日，爲客暖征鞍。

送王彥魯

北客憐同姓，南流感似人。  
相分豈相忘，臨路更情親。

送呂望之

池散田田碧，臺敷灼灼紅。  
年華豈有盡，心賞亦無窮。

別方劭祕校

迢迢建業水，中有武昌魚。  
別後應相憶，能忘數寄書。

梅花

牆角數枝梅，凌寒獨自開。  
遙知不是雪，爲有暗香來。

紅梅

春半花纔發，多應不奈寒。  
北人初未識，渾作杏花看。



病起過寶覺

執手乍欣悵。霜毛應更新。依然舊童子。卻想夢前身。

書定林院。聰問遠大師。師云。夜來夢與說十波羅蜜。

道人今輟講。卷袂寄松蘿。夢說波羅密。當如習氣何。

題徐浩書法華經

一切法無差。水牛生象牙。莫將無量義。欲覓妙蓮華。

碧蕪迴紋

碧蕪平野曠。黃菊晚村深。客倦留甘飲。身閑累苦吟。

夢長

夢長隨永漏。吟苦雜踈鍾。動蓋荷風勁。沾裳菊露濃。

送月

送月川魚躍。開雲嶺鳥翻。徑斜荒草惡。臺廢冶花繁。

泊鴈

泊鴈鳴深渚。收霞落晚川。柝隨風斂陣。樓映月低弦。

漠漠汀帆轉。幽幽岸火然。壑危通細路。溝曲繞平田。

題西太一宮壁二首 六首

草色浮雲漠漠，樹陰落日潭潭。一作柳葉鳴蜩綠暗，荷花落日紅酣。三十六陂流一作宮煙，水白頭想見江南。

二

三十年前此路，一作地。父兄持我東西。今日重來白首，欲尋陳迹都迷。

西太一宮樓

草際芙蓉零落，水邊楊柳欹斜。日暮炊煙孤起，不知魚網誰家。

卷二十七

律詩 七言絕句

歌元豐五首

水滿陂塘穀滿篝，漫移蔬果亦多收。神林處處傳簫鼓，共賽元豐第二秋。

二

露積成山百種收，漁梁亦自富鰕鱸。無羊說夢非眞事，豈見元豐第二秋。

三

湖海元豐歲又登，稻生猶足暗溝塍。家家露積如山壠，黃髮咨嗟見未曾。

四

放歌扶杖出前林。遙和豐年擊壤音。曾侍土階知帝力。曲中時有譽堯心。

五

豚柵雞埒晻靄間。暮林搖落獻南山。豐年處處人家好。隨意飄然得往還。

棊

莫將戲事擾真情。且可隨緣道我贏。戰罷兩奩分一作收白黑。一枰何處有虧成。

題畫扇

玉斧修成寶月團。月邊仍有女乘鸞。青冥風露非人世。鬢亂釵斜特地寒。

夢

黃梁欲熟且留連。漫道春歸莫悵然。蝴蝶豈能知夢事。蘧蘧飛墮晚花前。

清明

東城酒散夕陽遲。南陌鞦韆寂寞垂。人與長餅臥芳草。風將急管度青枝。

東岡

東岡歲晚一登臨。共望長河映遠林。萬竅怒號風喪我。千波競湧水無心。

春郊

青秧漫漫出初齊。雞犬遙聞路却迷。但見山花流水出。那知不是武陵溪。

元日

爆竹聲中一歲除。東風送暖入屠蘇。千門萬戶曠曠日。爭插一作總把新桃換舊符。

九日

九日無歡可得追。飄然隨意歷山陂。蔣陵西曲一作面風煙慘。一作澹也有黃花一兩枝。

初晴

幅巾慵整露蒼華。度隴深尋一徑斜。小雨初晴好天氣。晚花殘照野人家。

南蕩

南蕩東陂水漸多。陌頭車馬斷經過。鍾山未放朝雲散。奈此黃梅細雨何。

芙蕖

芙蕖耐夏復宜秋。一種今年便滿溝。南蕩東陂無此物。但隨深淺見游鯈。

溝西

溝西直下看芙蕖。葉底三三兩兩魚。若比濠梁應更樂。近人渾不畏春鉏。

東臯

東臯攬結知新歲。西崦攀翻憶去年。肘上柳生渾不管。眼前花發即欣然。

一陂

一陂一作段。澱水蔣陵西。含風却轉與城齊。周遭碧銅磨作港。逼塞綠錦剪成畦。

園蔬

園蔬小摘嫩還抽。畦稻新春滑欲流。枕簟不移隨處有。飽餐甘寢更無求。  
翛然

翛然三月閉柴荆。綠葉陰陰忽滿城。自是老年遊興少。春風何處不堪行。  
杖藜

杖藜隨水轉東岡。興罷還來赴一牀。堯桀是非時入夢。固知餘習未全忘。  
圖書

圖書老矣尙紛披。神劓天黥以有知。茅竹結蟠聊一悞。却尋三界外愚癡。  
老嫌

老嫌智巧累形軀。欲就田翁學破除。百歲用癡能幾許。救吾黥劓可無餘。  
移柳

移柳當門何啻五。穿松作徑適成三。臨流遇興還能賦。自比淵明或未慚。  
誰將

誰將石黛染春潮。復撚黃金作柳條。西崦東溝從此好。筍輿追我莫辭遙。  
雪乾

雪乾雲淨見遙岑。南陌芳菲復可尋。換得千顰爲一笑。春風吹柳萬黃金。  
南浦

南浦東岡二月時。物華撩我有新詩。含風鴨綠粼粼起。弄日鵝黃裊裊垂。

竹裏

竹裏編茅倚石根。竹莖踈處見前村。閉眠盡日無人到。自有春風爲掃門。

隨意

隨意柴荆手自開。溪岡度暫復登臺。小橋風露扁舟月。迷鳥羈雌竟往來。

秋雲

秋雲放雨靜山林。萬壑崩湍共一音。欲記荒寒無善畫。賴傳悲壯有能琴。

春風

春風過柳綠如縑。晴日烝紅出小桃。池暖水香魚出處。一環清浪湧亭臯。

陂麥

陂麥連雲慘淡黃。綠陰門巷不多涼。更無一片桃花在。借問春歸有底忙。

木末

木末北山煙冉冉。草根南澗水泠泠。縑成白雪桑重綠。割盡黃雲稻正青。

進字說二首

正名百物自軒轅。野老何知強討論。但可與人漫醬瓿。豈能令鬼哭黃昏。

鼎湖龍去字書存。開闢神機有聖孫。湖海老臣無四目。覆將精粕汗脩門。  
窺園

杖策窺園日數巡。攀花弄草興常新。董生只被公羊惑。肯信捐書一語真。  
嘲白髮

久應飄轉作蓬飛。眷惜冠巾未忍違。種種春風吹不長。星星明月照還稀。  
代白髮答

從衰得白自天機。未怪長青與願違。看取春條隨日長。會須秋葉向人稀。  
外廚遣火二首

竈鬼何爲便赫然。似嫌刀杙苦無羶。圖書得免同煨燼。卻賴廚人清不眠。  
二

青煙散入夜雲流。赤焰侵尋上瓦溝。門戶便疑能炙手。比鄰何苦卻焦頭。  
初夏卽事

石梁茅屋有彎碕。流水濺濺度兩陂。晴日暖風生麥氣。綠陰幽草勝花時。  
千蹊

千蹊百隧散林丘。圖畫風煙一色秋。但有興來隨處好。楊朱何苦涕橫流。  
和陳輔秀才金陵書事

南郭先生比鷓鴣。年年過我未愆期。休論王謝當時事。大抵烏衣祗舊時。

和耿天隲以竹冠見贈四首

竹根殊勝竹皮冠。欲著先須短髮乾。要使山林人共見。不持方帽禦風寒。

二

無物堪持比此冠。竹皮柔脆穀皮乾。故人戀戀綈袍意。豈爲哀憐范叔寒。

三

玉潤金明信好冠。錯刀剜出薜紋乾。不忘君惠常加首。要使懽盟未可寒。

四

冠工新意斲檀欒。霧卷雲烝久未乾。遣我山林真自稱。何須貂暖配金寒。

和郭公甫

且欲相邀臥看山。扁舟自可送君還。留連山郭今如此。知復何時伴我閒。

葉致遠置洲田以詩言志次其韻二首

吟歎君詩久掉頭。知君興不負滄洲。土山欲爲羊曇賭。且可專心學奕秋。

二

若將有限計無涯。自困真同算海沙。隨順世緣聊戲劇。莫言河渚是吾家。

又次葉致遠韻二首



庵成有興亦尋春。風暖荒萊步始勻。若遇好花須一笑。豈妨迦葉杜多身。

二

明時君尙富春秋。豈比衰翁遠自投。智略未應施畎畝。上前他日望吾丘。

次昌叔韻

寄公無國寄鍾山。垣屋青松掩鶴間。長以聲音爲佛事。野風蕭颯水潺湲。

次張唐公韻

憶昨同追八馬蹄。約公投老此山棲。公乘白鳳今何處。我適新年值白鷄。

次俞秀老韻

解我葱珩脫孟勞。暮年甘與子同袍。新詩比舊增奇峭。若許追攀莫太高。

酬宋廷評請序經解

未曾相識已相憐。香火靈山亦有緣。訓釋雖工君尙少。不應忽務世人傳。

送耿天隲至渡口

雪雲江上語依依。不比尋常恨有違。四十餘年心莫逆。故人如我與君稀。

承慶院送道原還儀真作詩要之

歲暮青條已見梅。餘花次第相爭開。淮南無此山林勝。作意春風更一來。

送方劭祕校

南浦柔條拂地垂。攀翻聊寄我西悲。武昌官柳年年好。他日春風憶此時。

芙蓉堂二首

投老歸來一幅巾。尙私榮祿備藩臣。芙蓉堂下疏秋水。且與龜魚作主人。

二

乞得膠膠擾擾身。五湖煙水替風塵。祇將鳧鴈同爲侶。不與龜魚作主人。

長干釋普濟坐化

投老唯公最故人。相尋長恨隔城闔。百年俯仰隨薪盡。畫手空傳淨戒身。

卷二十八

律詩 七言絕句

送黃吉甫入京題清涼寺壁

薰風洲渚薺花繁。看上征鞍立寺門。投老難堪與君別。倚江從此望還轅。

與道原自何氏宅步至景德寺元豐七年三月十九日

前時偶見花如夢。紅紫紛紛披競淺。深今日重來如夢覺。靜無餘馥可追尋。

過法雲

路過潮溝八九盤。招提雪脊隱雲端。金鈿一一花揔老。翠被重重山更寒。

光宅寺梁武帝宅也。其北齊安隔淮。齊武帝宅也。宋興又在其北。齊安孤起宋興前。光宅相仍一水邊。蜂分蟻爭今不見。故窠遺塚尙依然。

題勇老退居院

道人投老寄山林。偶坐翛然洗我心。夢境此身能且在。明年寒食更相尋。

與寶覺宿龍華院三絕句。舊有詩云。京口瓜洲一水間。鍾山只隔數重山。春風自綠江南岸。明月

何時照我還。

老於陳迹倦追攀。但見幽人數往還。憶我小詩成悵望。鍾山只隔數重山。

二

世間投老斷攀緣。忽憶東遊已十年。但有當時京口月。與公隨我故依然。

三

與公京口水雲間。問月何時照我還。邂逅我還還問月。何時照我宿金山。

清涼白雲庵

庵雲作頂峭無鄰。衣月爲衿靜稱身。木落岡巒因自獻。水歸洲渚得橫陳。

自定林過西庵

午雞聲不到禪林。柏子煙中靜擁衾。忽憶西巖道人語。杖藜乘興得幽尋。

歸庵

稻畦藏水綠秧齊。松鬣初乾尙有泥。縱蹇尋岡歸獨臥。東庵殘夢午時雞。

雪中遊北山呈廣州使君和叔同年

南州歲晚亦花開。有底堪隨驛使來。看取鍾山如許雪。何須持寄嶺頭梅。

謝安墩二首

我名公字偶相同。我屋公墩在眼中。公去我來墩屬我。不應墩姓尙隨公。

二

謝公陳迹自難追。山月淮雲祗往時。一去可憐終不返。暮年垂淚對桓伊。

東陂二首

東陂風雨臥黃雲。滕水翻溝隔壠分。春玉取新知不晚。腰鎌今日已紛紛。

二

荷葉初開筍漸抽。東陂南蕩正堪游。無端壠上脩脩麥。橫起寒風占作秋。

山陂

山陂院落今揆種。城郭樓臺已放燈。白髮逢春唯有睡。睡間啼鳥亦生憎。

欲往北山以雨止

北山朝氣澹高秋。欲往愁窳獨少留。散策緣岡初見日。與隨雲盡復中休。

耿天隲惠梨次韻奉謝

故人家果獨難忘。秋實初成便得嘗。直使紫花形味勝。豈能終日望咸陽。

二

淮圃新陰百畝涼。分甘每得助秋嘗。張公大谷雖云美。誰肯苞苴出晉陽。

三

甘滋南北共傳誇。栽接還如老圃家。誰謂交梨非外獎。因君澆灌已萌芽。

北山有懷

香火因緣寄此山。主恩投老更人間。傷心躑躅岡頭路。明日春風自往還。

定林

窮谷經春不識花。新松老柏自欹斜。慙慙更上山頭望。白下城中有幾家。

封舒國公三首

陳迹難尋天柱源。疏封投老誤明恩。國人欲識公歸處。楊柳蕭蕭白下門。

二

桐鄉山遠復川長。紫翠連城碧滿隍。今日桐鄉誰愛我。當時我自愛桐鄉。

三

開國桐鄉已白頭。國人誰復記前遊。故情但有吳塘水。轉入東江向我流。

北陂杏花

一陂春水繞花身。花影妖饒各占春。縱被春風吹作雪。絕勝南陌碾成塵。  
五更

青燈隔幔映悠悠。小雨含煙凝不流。祇聽蛩聲已無夢。五更桐葉強知秋。

與薛肇明弈棋賭梅花詩輸一首

華髮尋春喜見梅。一株臨路雪培堆。鳳城南陌他年憶。杳杳難隨驛使來。

又代薛肇明一首

野水荒山寂寞濱。芳條弄色最關春。故將明豔凌霜雪。未怕青腰玉女噴。

溝上梅花欲發

亭亭背暖臨溝處。脈脈含芳映雪時。莫恨夜來無伴侶。月明還見影參差。

江梅

江南歲盡多風雪。也有紅梅漏洩春。顏色凌寒終慘澹。不應搖落始愁人。

耿天隲許浪山千葉梅見寄

聞有名花卽謾栽。慙慙準擬故人來。故人歲歲相逢晚。一作能相見知復同看幾度開。

與天隲宿清涼廣惠僧舍

故人不惜馬虺隤。許我年年一度來。野館蕭條無準擬。與君封殖浪山梅。

池上看金沙花數枝過酴醾架盛開二首

午陰寬占一方苔。映水前年坐看栽。紅蕊似嫌塵染污。青條飛上別枝開。

二

醅醞一架最先來。夾水金沙次第栽。濃綠扶疎雲對起。醉紅撩亂雪爭開。

北山

北山輸綠漲橫陂。直壑回塘澗澗時。細數落花因坐久。緩尋芳草得歸遲。

詠菊二首

補落迦山傳得種。閻浮檀水染成花。光明一室真金色。復似毗耶長者家。

二

院落秋深數菊叢。綠花錯莫兩三峯。蜜房歲晚能多少。酒盞重陽自不供。

楊柳

楊柳杏花何處好。石梁茅屋雨初乾。綠垂靜路要深駐。紅寫清波得細看。

北山道人栽松

陽坡風暖雪初融。度谷遙看積翠重。磊砢拂天吾所愛。他生來此聽樓鐘。

山櫻

山櫻抱石蔭松枝。比並餘花發最遲。賴有春風嫌寂寞。吹香渡水報人知。

儂薛肇明秀才楨木

濯錦江邊木有橙。小園封植佇華滋。地偏或免桓魋代。歲晚聊同庾信移。

馬斃

恩寬一老寄松筠。晏臥東牕度幾春。天廐賜駒龍化去。謾容小蹇載閑身。

出郊

川原一片綠交加。深樹冥冥不見花。風日有情無處著。初迴光景到桑麻。

懷府園

槐陰過雨盡新秋。盆底看雲映水流。忽憶小金山下路。綠蘋稀處看游鯈。

江寧夾口二首

鍾山咫尺被雲埋。何況南樓與北齋。昨夜月明江上夢。逆隨潮水到秦淮。

二

日西江口落征帆。卻望城樓淚滿衫。從此夢歸無別路。破頭山北北山南。

蔣山手種松

青青石上歲寒枝。一寸巖前手自移。聞道近來高數尺。此身蒲柳故應衰。

中年

中年許國邯鄲夢。晚歲還家壙垆遊。南望青山知不遠。五湖春草入扁舟。

寄四姪旒



數篇持往助歡哈。想見封題手自開。春草已生無好句。阿連空復夢中來。

二

一日東岡上幾迴。百重雲水隔蘇臺。一作一日東岡望百迴。迢迢雲水隔蘇臺。遙知別後詩無數。黃犬歸時總寄來。

寄吳氏女子

夢想平生在一丘。暮年方此得優游。江湖相忘真魚樂。怪汝長謠特地愁。

寄蔡天啟

杖藜緣塹復穿橋。誰與高秋共寂寥。佇立東岡一搔首。冷雲衰草暮迢迢。

呈陳和叔

數椽生草覆莓苔。一作數椽半落長莓苔。一徑牆陰斷雪開。王吉囊衣新徙舍。杖藜從此爲君來。

二

數椽庫屋茨生草。三畝荒園種晚蔬。永日終無一杯酒。可能留得故人車。

招葉致遠

白下長干一水間。竹雲新筍已斑斑。明朝若有扁舟興。落日潮生尙可還。

招楊德逢

山林投老倦紛紛。獨臥看雲卻憶君。雲尙無心能出岫。不應君更懶於雲。

和叔招不往

門前秋水可揚舲，有意西尋白下亭。只欲往來相邂逅，卻嫌招喚苦丁寧。

和叔雪中見過

捐書去寄老山林，無復追緣緣一作尋往事心。忽值故人乘雪興，玉堂前話得重尋。

愈秀老忽然不見

忽去飄然遊冶盤，共疑枝策在梁端。禪心暫起何妨寂，道骨雖清不畏寒。

與耿天隲會話

邯鄲四十餘年夢，相對黃梁欲熟時。萬事祇如空鳥迹，怪君強記尙能追。

